

Ḱapiya Sën Paulus Kevu Vu Kerisi-yi-alam Vu Rom

Huk Sinarë Sën Paulus Nevong Lo Degwa

¹ Kerisi Yesu yi hur sa Paulus. Yō vong sa mesetu sinarë beggooin sa rak bë sa nanér Bengö Nivesa rangah. ² Sën Anutu yō nér verup alam-denenér-gagek-rangahsën avij wirek rot meneggëp lok yi kapiya lo. ³ Bengö Nivesa sënë rak Nalu Yesu Kerisi, hil Mehöböp sën yam tu mehönon lok Davit* yi mewis lo.

⁴ Lob Anon Vabuung vong bekedi rak yah vu bedub, lob sën kedi rak yah vu bedub lo tato rangah bë Anutu Nalu los niwëek yön. ⁵ Lob Anutu vong semusemu vu hil degwa rak yi timu. Bevong he behe tu sinarë in bë gako arë jak menanér rangah vu mehönon pin vu dob nabë ayoj na timu vu yi medegevek babu.

⁶ Log Anutu yi köök yön vu ham alam Rom bë ham natu Yesu Kerisi yi alam geving. ⁷ Om sën sa kevu ḡapiya sënë yön vu ham Rom pin sën Anutu kwa pesivin ham beggooin ham rak in bë ham natu yi alam lo. Hil Amad Anutu luho Mehöböp Yesu Kerisi degevong semusën vu ham bedegevong ham ayomin gëp revuh.

Paulus Kwa Vo Bë Na Gelë Alam Rom

⁸ Sa bë nanér jak sënë namugin rë: Alam pin dengo medenenér yoh vu nyëg pin bë ham ayomin neya timu vu Yesu, om sën sa najom rak vu Kerisi bë nanér vu Anutu nabë sa kwag vesa rot in

ham pin. ⁹ Sayog neya vu Anutu genekehe sa bë sa gevong yi huk benanér Nalu yi Bengö Nivesa rangah. Lob Anutu yö rak ni bë sa kwağ nevo ham menajom rak in ham yoh vu buk. ¹⁰ Sa su halë ham wirek rë, om sën sa neketağ vu Anutu yoh vu buk bë kwa og yö natök vu aggata besenök vu ham. ¹¹ In sahëg ving pangsen bë senök galë ham, besa gevong Anon Vabuung yi semusën vahi sën vo vu sa lo vu ham geving in bo niwëëk vu ham. ¹² Sa kwağ nevo bë ham vongvingsën rëk gadu sa, gesa vongvingsën rëk gadu ham, behil abo niwëëk dok hil vewen vewen nabë sënë.

¹³ Arig lo, om sën sa bë ham jak ni nabë beron ngahisekë og sa nehevongin bë senök vu ham. In sa bë gako ham vahi nom vu Anutu nabë sën sa nehaço alam-yu-ngwë vahi deyom ggovek lo. Rëk sa hög aggata ma. ¹⁴ Anutu vo huk lok sa nemağ meneggëp bë sa tatekin yi gagek vu alam Grik sën denedo nivesa lo, gevu alam nyëg vahi sën denedo paya lo geving. Vu alam los kwaj, gevu alam kwaj masën geving. ¹⁵ Om sën sa kwağ nevo pangsen bë sa nanér Bengö Nivesa vu ham alam Rom geving.

Bengö Nivesa Sënë Tato Anutu Niwëëk

¹⁶ In sa su niğ nemum in Bengö Nivesa rë. In tu Anutu yi niwëëk beyoh vu bë geko alam sën ayoj neya timu vu Yesu lo nah. He alam Yuda namugin, lok mëm ham alam-yu-ngwë gökin. ¹⁷ Log Bengö Nivesa sënë netato bë Anutu mehö niröp los yohvu. Nabë mehöti gevong geving Bengö Nivesa, og rëk ayo na timu vu Yesu noh vu sën dekevu meneggëp lok Anutu-yi-ķapiya lo bë, “Mehöti bë

ayo na timu vu yi, og Anutu rëk nanër mehö sënë nabë yi mehö yohvu, lob medo mala-tumsën.”

Mehönon Pin Deneruu Demij Vu Anutu

¹⁸ Hil narak ni bë, Anutu ahë sengën benevo nipaya nyëvewen neyam vu yagek lok yah vu alam pin sën deneruu demij vu yi, gedenevong ngaa nipaya medenedahun yi gagek anon rak hir ngaa nipaya lo. ¹⁹ In Anutu yi ngaa sën hil ayoh vu bë galë majak ni lo neggëp rangah vu alam sën deneruu demij vu yi agi. In Anutu yö tato rangah vu mehönon pin ggovek ya. ²⁰ Yönon, alam delë dob los ngaa pin sën Anutu tung lo wirek beyam verup gwëbeng, lom sënë tato Anutu yi ngaa vahi sën mehönon su deyoh vu bë degelë jak malaj rë lo vu hil. Log ngaa sën hil su ayoh vu bë galë jak malad rë lo, og saga tatekin Anutu yi degwa los yi niwëek böpata sën neggëp ving yi degwata los degwata lo rangah vu hil. Nebë sënë, om mehönon su deyoh vu bë dedah hir nipaya vun gedenanér nabë, “Sa su rak ni bë ngaa nipaya rë!” ²¹ In mehönon derak Anutu ni rëk su kwaj nevo bë Anutu yönö bedeko arë rak rë. Gesu kwaj vesa vu yi in ngaa nivesa vesa pin sën vo vu sir lo rë. Gak kwaj nesepa lok gagek meris meris bedenetu alam kwaj masën bedenedo lok malaķenu. ²² Deko sir rak medenenér bë, “He alam los kwamin!” rëk ma gedetu alam kwaj masën. ²³ Gederuu demij vu Anutu, mehö los niwëek sën su nediiķ rë lo. Log tum ngaa sën denediiķ medenepetar ya lo nebë mehönon, gesok los reggu genyël lo, og denesemu kenuj medeneko arëj rak medenejom rak vu sir.

Nipaya Aggagga

²⁴ Lob Anutu nilëlin sir bë, maam kwaj nipaya yö gelî sir na vu ngaa nipaya sën ahëj neving lo, gevü ngaa ningöhek sën su yoh vu rë lo, beyö debasap navij. ²⁵ Alam nebë sënë denevuu Anutu yi gagek anon ya gedenepekwë medenekö gagek kuungsën rak. Log deneruu demij vu Anutu sën ngaa pin ala lo, gedenejom rak vu ngaa sën Anutu tung lo gedenesepa lok yö hir aggata. Nij nelëlin Anutu sën hil gako arë jak na vavunë mebare mena degwata los degwata lo. Yönon. ²⁶ Om sën Anutu nilëlin sir bë yö demedo dok hir ngaa nipaya sën malaj anon in lo. Avëh og nij nelëlin hir aggata niröp sën dejak maluh lo, gedeneeggérin sir yah medenevong ngaa sën su yoh vu rë lo ving avëh ngwë. ²⁷ Gemaluh ving nebë saga. Nij nelëlin aggata niröpsën sën degekö avëh lo gayoj vev rasap rasap nebë nengwah in bë yö degevong ngaa nipaya vu maluh ngwë. Maluh sënë denevong ngaa nimumsën ving mehö ngwë lob yö denekö nyévewen nipaya lok yah, yoh vu hir nipaya sënë. ²⁸ In nij nelël bë su kwaj bo Anutu gëp ayoj, lom Anutu lëein sir ya beyö medo denevong yoh vu kwaj nipaya sënë, bedenevong ngaa nipaya aggagga sën su yoh vu bë mehönon degevong rë lo. ²⁹ Denevong ngaa pin sën su niröp rë lo bengaa nipaya pin pup ayoj. Ayoj nevu nevu in ngaa nipaya pangüsën gedeneleë alam vahi paya. Ayoj nesis yi vu alam vahi ga, denesis alam medenediik. Denenër sir ga, denetetuhin mehö ngwë gedenevong paya vu sir. Denevengwëng gagek yah nenga rak mehö ngwë ga, ³⁰ denenër gagek kuungsën rak mehö ngwë ving bë nij paya. Denelë Anutu paya medenesis begö vu yi ga, denenër pelësën ga, denekö sir rak

medenevong paang. Denevér ngaa nipaya mewis mewis verup. Gedenekeyéh amaj lu ataj ayej.

³¹ Kwaj ma! Denenér rëk su denevong yoh vu hir gagek rë. Su ahéj neving sir sën yȋk sir degwa timu lo rë. Gesu kwaj nevongin mehö ngwë rë.

³² Anutu yi horek nér nebë alam sën degevong ngaa nabë sënë og yoh vu bë denadiik bemalaj nama. Lob alam sënë derak horek sënë ni ggovek ya, rëk ma gemedo denevong ngaa nebë sënë. Lob su denevong sënë mu rë, gak kwaj vesa in alam sën denevong ngaa nebë agi ving, medenepisek in sir medenelev horek in.

2

Anutu Nengo Hil Gagek Degwa Og Neseggi Niröp

¹ Om sa nanér vu ham ti ti sën ham nenér mehö ngwë bë nij paya lo nabë: Su geyoh vu bë gedah ngo hong nipaya vun rë. In gengó! Genenér mehö ngwë bë nipaya, lob sënë og yȋk genenér valek hong ving nebë saga bë nim paya. In yȋk ngaa sën genenér rak yi lo, og yȋk genevong nebë sënë ving. ² Lob hil arak ni bë Anutu nevo nipaya nyévewen vu alam sën denevong ngaa nebë agi, lob sënë og Anutu nevong yoh vu. ³ Om hong sën genenér alam sën denevong ngaa nipaya nebë agi bë nij paya lo, rëk mu yȋk genevong nebë sënë ving, ma gekuung bë? Su geyoh vu bë rëk gebeya in Anutu megenoh nenga in nyévewen rë.

⁴ Ma nebë va? Anutu nevong nivesa rot vu hong menegin hus adingsekë rot gesu nevo nyévewen vu hong pevis rë. Anutu yi ngaa nivesa sënë, mak gekuung bë ngaa meris-a? Gak Anutu nevong

nivesa vu hong sënë in bë gegwérin hong. ⁵ Sën ayom niwëek ata gesu genewérin hong rë lo, og sënë nebë sën ngo genebun hong nipaya nyëvewen rak bun, lom Anutu ahë sengën rot vu hong. Rëk mém dok buk-ahësengën-yi sën Anutu bo nyëvewen niröp noh vu mehönon pin lo, og rëk genatök vu nyëvewen böpata jak hong nipaya sënë. ⁶ In rëk bo nyëvewen gelek mehönon pin noh vu ngaa sën denevong lo. ⁷ Alam sën denejom sir ahon medenedo rak ngaa nivesa medenevong in bë denatu alam-los-bengöj gelos arëj bëp gedemedo malaj-tumsën lo, og Anutu rëk gevong bedemedo malaj-tumsën degwata los degwata. ⁸ Gaç alam sën yö kwaj nevo sir mu gedeneruu demij vu gaçek anon, gedenesepa lok ngaa nipaya lo, og Anutu rëk ahë sengën böpata mebo nyëvewen nipaya rot vu sir. ⁹ Maggin böpata los nisangsën rëk gebom alam pin sën denevong ngaa nipaya lo. Alam Yuda namugin, lok mém alam-yu-ngwë gökin. ¹⁰ Gaç alam pin sën denevong nivesa lo, og Anutu rëk gevong bedenatu alam-los-bengöj, garëj bëp jak, bayoj gëp revuh. Rëk alam Yuda namugin, lok alam-yu-ngwë gökin. ¹¹ In Anutu su kwa nevo mehönon arëj bë sir bëp benevong nyëvewen vu sir rë, gaç nevong nyëvewen yoh vu ngaa sën denevong lo.

¹² Lob alam-yu-ngwë sën su denesepa lok alam Yuda hir horek rë lo, og Anutu su rëk seggi sir jak alam Yuda hir horek rë, rëk mu rëk malaj nama geving in su denesepa lok yö hir aggata niröp rë. Gaç alam sën denesepa lok alam Yuda hir horek lo, og Anutu rëk seggi sir jak, gebo nyëvewen vu

sir in dekeyëh. ¹³ Alam sën denengo horek meris mu lo su rëk arëj nabë sir alam yohvu gëp Anutu mala rë. Gak alam sën denesepa lok horek lo mu, sën mëm rëk arëj nabë sir alam yohvu. ¹⁴ Nebë sënë lob alam-yu-ngwë su denerak alam Yuda hir horek ni rë, rëk mu yö denesepa lok yö hir horek vahi beya nevalek gagek vahi sën alam Yuda hir horek nér lo. Om sir dugin alam Yuda hir horek rëk mu saga tato bë Anutu yi horek vahi neggëp lok ayoj ving. ¹⁵ In hir horek neggëp lok ayoj bekwaj nevo ngaa vahi bë nivesa gengaa vahi bë nipaya, lom deneseggi sir lok ayoj bedenenér bë denevong sënë, og yoh vu, gesagi, og su yoh vu rë. ¹⁶ Log Anutu rëk nanér vu Buk-tamusën, lob Kerisi Yesu rëk seggi mehönon pin hir gagek vunsën nabë sën sa nanér rangah vu ham lok Bengö Nivesa lo.

Alam Yuda Devong Ving Bë Horek Yoh Vu Bë Dok Vu Sir

¹⁷ Gak hong! Arëm nebë Yuda, gekwam nevo bë horek sën Anutu vo vu alam Yuda lo yoh vu bë dok vu hong in gagek. Gengo geneko arëm rak megenenér bë Anutu-yi-alam hong. ¹⁸ Gerak Anutu kwa ni. Geluk dub lok horek saga ggovek, om sën gerak aggata niröpsën-yi ni bahëm neving. ¹⁹ Gekwam nevo bë geyoh vu bë getato aggata niröp vu alam malaj ķenod, lob alam sën denedo lok malakenu lo, og getato rangah vu sir.

²⁰ Log kwam nevo ving nebë kwa los gagek anon pin neggëp lok ham horek sagi, om sën geyoh vu bë ġebo kwa vu alam kwaj masën megetahu alam sën denedo ngök ngök nebë hurmahen lo dok gagek. ²¹ Yonon, genetahu alam vahi, rëk

nebë va sën su ngo genetahu hong lok rë-ë? Genenér vu alam bë su degodek, rëk mu ngo genehodek. ²² Gegegenér bë alam su degevong baggëb, rëk mu ngo genevong. Nim nelélin anutukuungsën rëk mu genelok ya alam dahis hir dub ayo megenehodek hir anutu-kuungsën hir ngaa. ²³ Ngo geneko arëm rak megenenér bë gerak Anutu yi horek ni, rëk mu ngo genekweyéh yi horek megenevasap Anutu arë rak ngaa nebë saga. ²⁴ Yonon, sënë yoh vu gagek sën neggëp lok Anutu-yi-kapiya lo bë: Alam dahis denenér pelésen rak Anutu arë, log degwa vu ham.

Bë Degerah Navij Og Saga Su Yoh Vu Bë Geko
Sir Nah Vu Anutu Rë*

²⁵ Sën derah* navim lo, nabë gesepa dok Horek, og sagak ngaa nivesa. Yonon, derah* navim vorot, rëk mu nabë gekweyéh horek, og yīk nebë sën su derah* rë. ²⁶ Nebë sënë, om mehöti sën su derah* navi rë lo, nabë sepa dok horek, og mehö sënë rëk bengö na nabë alam sën derah* navij vorot lo. ²⁷ Yonon, Anutu vong horek meneggëp vu hong Yuda, lob derah* navim ving. Rëk nim lël megenekweyéh horek, om mehö-yu-ngwë sën su derah* navi rë rëk nesepa lok horek anon lo, og yi huk saga tato rangah bë nim paya om rëk gweko nyëvewen. ²⁸ Alam Yuda og Anutu-yi-alam sir, rëk mu nabë mehöti ama lu ata Yuda, og saga mu su yoh vu bë gevong bemehö saga natu Anutu-yi-alam yonon rë. Log nabë degerah* mehöti navi, og saga mu su yoh vu bë gevong bemehö saga natu Yuda ti yonon rë. ²⁹ Gāk yīk mehö sën ayo neya timu vu alam Yuda hir ngaa lo, sën yi Yuda

sogek. Log yiķ mehö sēn ayo neya timu vu Anutu lo, sēn netu Anutu-yi-alam sogek. Mehö nebë sēnë su nesepa lok horek meris mu rë, gaķ nesepa lok los kwa nevo, bayo neya timu. Mehönon maķ su rëk degekō mehö nebë sēnë jaķ rë, gaķ Anutu yō rëk geķo yi jaķ.

3

Ngaa Nipaya Su Yoh Vu Bë Dahun Ngaa Nivesa Rë

¹ Nebë sēnë, om alam Yuda rëk dekesuu mehö ngwë nabë va? Geva nivesa neverup rak sēn denerah* navij-ë? ² Alam-e! Yi ngaa nivesa aggagga neggëp! Nyëmuğinsën nebë sēnë: Anutu vo yi gaġek vu alam Yuda in bë degegin. ³ Yonon, rëk mu sir la su denevong yoh vu gaġek sēnë rë. Om Anutu maķ rëk gevek hir ngaa nipaya saga babu bedahun yi gaġek nivesa na? ⁴ Rëk nama! Nabë mehönon pin denanér gaġek kuungsën, og sēnë su rëk pekwë Anutu rë, gaķ yō rëk medo menanér yönnon degwata los degwata. Yiķ yoh vu gaġek sēn neggëp lok yi kapiya lo bë:

“Hong gaġek pin og niröp rot.

Om nabë degevong gaġek vu hong, og rëk kwesuu sir yönnon.”

⁵ Om hil rëk nanér nabë va? Nabë hil nehevong ngaa nipaya gAnutu nevong ngaa yohvu mu, og maķ Anutu su yoh vu bë bo nyévewen doķ nah hil ngaa nipaya rë? In hil ngaa nipaya tato yi ngaa nivesa rangah bevong barë bōp rak mekesuu-a?—sēnēk sa nesepa lok mehönon kwaj mu mesenér—⁶ rëk nama! Hil su rëk nanér nabë saga rë, in nabë Anutu su mehö yohvu rë, og su yoh vu bë rëk seggi

mehönon hir ngaa pin bebo nyëvewen dok nah vu
sir rë.

⁷ Log nabë hil nanér nabë mehönon degekö Anutu arë jak rot, in delé bë sa mehö gagek kuungsën, rëk yi og mehö nenér gagek los anon, og mak su yoh vu bë rëk bo nipaya nyëvewen dok nah vu sa rë? In ngaa nipaya sën sa nehevong lo tato yi ngaa nivesa rangah barë böp rak mekesuu-a? ⁸ Bë nabë sënë, og hil rëk nanér nabë, “Ham-o! Behil gevong ngaa nipaya in ngaa nivesa rëk berup jak!” Log alam vahi denekuung rak medenenér gagek rak he yah nenga bë he nanér nebë sënë! Rëk ma! Hil su ayoh vu bë gevong nabë sënë rë! Om alam sën denenér bë aga rëk degekö nyëvewen dok nah beyoh vu.

Mehö Nivesa Ti Su Nedo Rë

⁹ Om-a? Mak hil Yuda kesuu alam-yu-ngwë? Ma verök yi! He nér ggovek ya bë hil pin nado lok ngaa nipaya ayo peggó. Hil Yuda los alam-yu-ngwë pin.

¹⁰ In gagek neggëp lok Anutu-yi-kapiya nebë:
“Mehö nivesa ti su nedo rë, gema verök yi.

¹¹ Mehö los kwa ti su nedo rë,
geti su nesero Anutu in bë jak ni rë.

¹² Mehönon pin deyoh paya in aggata niröp,
gesir pin los dahis nij paya rak.

Gak mehöti su nevong ngaa nivesa rë, gema verök yi.
Ti su nebë sënë menedo rë.”

¹³ “Avij nebë asoreng vu bedub ggëp netök,
gedaggej nenér gagek kuungsën.”

“Vong bë nyël nevu parahek nipaya nedo lok avij”,
¹⁴ “medeneterot mehönon rak gagek nipaya”.

- 15 “Deneserög pevis in bë dengis mehönon medenadiik.
- 16 Denevong rii rak ngaa nivesa pin vu nyëg pin sën deneya lo,
bedenevong maggin vu alam.
- 17 Malaj nesepa begö gesir dugin gagek-ahë-yes.”
- 18 “Su kwaj nevo Anutu bedeneggöneng in yi rë.”
- 19 Yönon, hil arak ni bë gagek sën neggpəl lok horek lo neggpəl vu alam sën deneggevek horek babu lo. Rëk mu Anutu yi horek og neggpəl in bë mehönon pin nij namum bayej nama, gedejak ni nabë gagek neggpəl vu sir berëk degeko nyëvewen jak hir nipaya. ²⁰ In sën hil sepa dok horek lo, og su yoh vu bë gevong bemehöti natu mehö niröp gëp Anutu mala rë. Gak yik timu sënë nebë horek netato hil ngaa nipaya rangah vu hil behil naraq ni bë hil keyëh.

Mehö Sën Ayo Neya Timu Vu Kerisi Lo, Og Mëm Arë Nebë Mehö Yohvu

- 21 Wirek Anutu tato rangah rak horek los alam-denenér-gagek-rangahsën hir gagek bë yi mehö yohvu yönö, rëk gwëbeng og yö tato rak agga ngwë. ²² Ngaa agga ngwë sënë sën netato bë Anutu mehö yohvu yönö lo nebë: Nabë mehöti ayo na timu vu Yesu Kerisi, og Anutu rëk nanér yi nabë mehö yohvu. Lob alam pin sën ayoj na timu vu yi lo yik arëj nebë sënë. Aläm Yuda galam-yu-ngwë ving. ²³ Yönon! Hil mehönon pin nehevong ngaa nipaya, gehil araain besu ayoh vu bë gevong noh vu Anutu kwa rë. ²⁴ Rëk Anutu vong semusën sënë vu hil nyëmasën nebë hil atu alam yohvu, degwa

raķ sën Kerisi Yesu lok yah hil bed bediik in hil lo.

²⁵ Anutu ggooin Yesu rak in bë nadiiķ bekök keseh in kevoh alam sën ayoj na timu vu yi lo hir ngaa nipaya na. Anutu su nevong newa newa benevo nyëvewen lok yah alam hir ngaa nipaya pevis rë, gak yö jom yi ahon. Lok mëm vong Kerisi yam bediik lok yah hil bed in bë tato rangah nabë su kwa nevirek in mehönon hir ngaa nipaya rë, gak yi og mehö yohvu benevo nyëvewen lok yah. ²⁶ Kë, vong Kerisi yam lok buk sën gwëbeng agi in bë tato rangah nabë yi mehö yohvu yönö. Lob vong yam in bë hil ajak ni nabë Anutu su nevong ngaa jeggin jeggin rë. Gak mehöti sën ayo na timu vu Yesu lo, og Anutu rëk nanér yi geving nabë yi mehö yohvu. ²⁷ Nebë sënë, om hil anoh aggata tena in bë gaķo arëd jaķ nabë hil alam yohvu? Ma! Aggata su neggp rë! In va nenérin sën hil gaķo arëd jaķ-ë? Horek nenérin-a? Ma huk sën hil nehevong lo nenérin-a? Ma! Ngaa nivesa ti su neggp vu hil rë, gak hil nehevong ving bë Yesu diiķ lok yah hil bed, om hil su ayoh vu bë gaķo ngo arëd jaķ rë.

²⁸ In hil arak ni nebë hil atu alam yohvu rak sën hil ayod neya timu vu Yesu lo, gak su neraķ sën hil nesepa lok horek lo rë. ²⁹ Ma nebë va? Mak alam Yuda mu yö hir Anutu sënë ma, alam-yu-ngwë hir Anutu ving-a? Gak yiķ alam-yu-ngwë hir Anutu ving! ³⁰ In yiķ Anutu yö timu. Lob alam sën derah* navij gayoj neya timu vu Yesu lo, sën Anutu rëk nanér sir nabë sir alam yohvu. Log yiķ alam sën su derah* navij rë, rëk ayoj neya timu vu Yesu lo, yiķ Anutu rëk nanér sir geving nabë sir alam yohvu.

³¹ Om sën hil ayod neya timu vu Yesu lo mak dahun horek ya betu ngaa meris-a? Ma! Gaġek sën sa

kevu agi tato bë horekek ngaa anon ving.

4

Anutu Nér Abraham Bë Yi Mehö Yohvu

¹ Abraham ni nebë hil behil dobahë yi. Om hil rëk nanér va jak yi? ² Yonon, nabë Abraham tu mehö yohvu rak yi huk, og yoh vu bë yö gekö arë jak. Gak gëp Anutu mala og ma! ³ In Anutu-yi-kapiya nér bë, “Abraham ayo neya timu vu Anutu, lob Anutu kwa nevo benér yi nebë mehö yohvu.”

⁴ Log nabë mehöti gevong huk megekö monë jak, og hil su nanér nabë nekö monë saga nyëmasën. Gak mu nekö rak yi huk. ⁵ Nebë saga, om nabë mehöti ayo na timu vu Anutu sën yoh vu bë nanér mehönon nij paya nabë sir alam yohvu lo mu, gesu kwa bo yi huk nabë Anutu rëk gevong nyëvewen doķ nah menanér yi nabë mehö yohvu rë, og mëm Anutu rëk gelé nabë ayo neya timu vu yi, lob rëk nanér yi nabë yi mehö yohvu.

⁶ Log Davit nér rak mehö nebë sënë ving nebë, “Mehöti sën hen huk nivesa ma, rëk Anutu nenér yi nyëmasën nebë mehö yohvu lo, og mehö nebë sënë rëk kwa vesa rot.” ⁷ Log nér ving bë:

“Alam sën Anutu ko hir ngaa nipaya vër medahun ya lo, og kwaj vesa!

⁸ Gemehöti sën Mehöbëp nér yi bë ngaa nipaya su neggëp vu yi rë lo, og kwa vesa.”

⁹ Om alam sën denerah* navij lo, kwaj vesa in sën Anutu kevoh hir ngaa nipaya ya lo, log yik alam sën su denerah* navij rë lo, og kwaj vesa in Anutu kevoh hir ngaa nipaya ya ving. Ham kwamin bo Abraham gökin rë! Hil nanér nebë:

Anutu kwa nevo bë Abraham ayo neya timu vu yi lom nér yi nebë mehö yohvu.

¹⁰ Lob Anutu nér Abraham nebë yi mehö yohvu nangërek-a? Maķrah* navi ggoovek ya rëk mëm, ma su rah* navi rë? Gaķ su rah* navi rë geyö nahën, log Anutu nér yi nebë yi mehö yohvu. ¹¹ Lok mëm rah* navi, lom navi tato bë ayo neya timu vu Anutu ggoovek ya om sën Anutu nér yi vorot bë yi mehö yohvu. Lob tu alam pin sën su denerah* navij rë rëk ayoj neya timu vu Anutu lo hir dobahë, in tato nebë Anutu rëk nanér sir geving nabë sir alam yohvu. ¹² Getu alam sën denerah* navij lo vahi hir dobahë ving. Sir sën denerah* navij lo rëk su kwaj nevo saga mu rë, gaķ denesepa lok Abraham vaha bayoj neya timu vu Anutu, nebë sën Abraham su rah* navi wirek rë, rëk ayo neya timu vu yi lo.

Anutu Yi Gagek Yam Vu Alam Sën Ayoj Neya Timu Vu Yi

¹³ Anutu su kwa vo bë Abraham nesepa lok horek om sën ggooin losho yi mewis lo rak in bë mehönon pin degevek babuj rë. Gaķ lë bë Abraham ayo neya timu vu yi, lob nér yi bë yi mehö yohvu, lom mëm sën nér bë rëk gevong bemehönon pin degevek yi mewis lo babuj. ¹⁴ Rëk nabë mehönon pin saga degevek alam sën denesepa lok horek lo babuj mu, og sën hil ayod neya timu lo tu ngaa meris mu, gAnutu hen ġagek sën joo venuh lo anon ma. ¹⁵ Hil arak ni bë horek netato bë hil rëk gaķo nyëvewen dok nah hil ngaa nipaya. Gaķ bë horek nama, og hil su ayoh vu bë nanér nabë mehönon denekeyëh horek rë. ¹⁶ Nebë

sënë, om Anutu yi gagek semusën rëk anon jak vu alam sën ayoj neya timu vu yi lo. Lob vongin bë gevong semusën sënë nyëmasën vu hil geving Abraham yi mewis pin benatu hil ngaa. Su rëk gevong vu Abraham yi mewis sën denesepa lok horek mu lo menatu hir ngaa rë, gak rëk gevong vu alam pin sën ayoj neya timu vu yi nebë Abraham lo menatu hir ngaa. In Abraham tu hil pin sën hil ayod neya timu vu Yesu lo hil dobahë. ¹⁷ Yoh vu gagek sën neggëp lok Anutu-yi-kapiya lo bë: “Sa hevong hong tu alam ngahisekë hir dobahë.” Lob Abraham tu hil dobahë ggëp Anutu mala in ayo neya timu vu yi. Gevong ving bë Anutu yoh vu bë nanér balam-diiksën dekedi jak nah medemedo malaj-tumsën, geyoh vu bë nanér gagek jak alam sën deberup vu tamusën lo geving nabë sën denedo vorot lo.

¹⁸ Ngaa sën Anutu nér agi su anon rak in Abraham lë vorot mevong ving niwëëk rë, gak vong ving niwëëk bë rëk anon jak yönö nabë sën lë rak mala lo. Nebë sënë, om sën tu alam ngahisekë hir dobahë yönö yoh vu sën Anutu nér lo bë, “Hong mewis lo rëk deberöng nabë betuheng!” ¹⁹ Abraham yi ngebek dus rak mehödahis nemadvahi (100), lom navi su niwëëk yoh vu bë geko nalu rë. Lob yiķ venë Sara nebë saga ving. Abraham rak sënë ni, rëk ma gevong ving niwëëk. ²⁰ Anutu nér bë ngaa sagi rëk berup, lom Abraham su kwa neya luu luu in rë. Gak vong ving niwëëk geko Anutu arë rak, ²¹ geraķ ni bë Anutu yoh vu bë rëk gevong gagek sën nér lo banon jak. ²² Lob Anutu rak ni bë Abraham ayo neya timu vu yi nebë sënë, lom nér yi bë yi mehö yohvu.

²³ Log ǵagek sënë neggëp lok Anutu-yi-kapiya bë, “Anutu nér yi bë yi mehö yohvu.” Lob sënë og su nér Abraham yö timu rë. ²⁴ Gak nér rak hil ving. Bë hil ayod na timu vu Anutu sën nér behil Mehöböp Yesu kedi rak yah vu bedub ggökin lo, og mém rëk gelë hil nabë saga geving menanér nabë hil alam yohvu. ²⁵ Anutu vong Yesu yam bekō hil ngaa nipaya nyévewen rak yah yi mediik. Log Anutu nér mekedi rak yah ggökin in bë nanér hil nabë hil alam yohvu.

5

Anutu Nér Hil Bë Hil Alam Yohvu

¹ Hil ayod neya timu vu Yesu lom Anutu nenér hil nebë hil alam yohvu, om sën hil los Anutu nado revuh ti degwa rak hil Mehöböp Yesu Kerisi. ² Hil ayod neya timu vu yi, lom sën gwëbeng og Anutu nelë hil nivesa gehil kwad vesa rot, in hil arak ni bë rëk geko hil nah yi nyég mebo semusën nivesa vesa pin vu hil. ³ Rëk mu hil su napisek in sagi mu. Gak hil napisek in maggin sën netök vu hil lo geving. In hil narak ni bë maggin nevo niwëek vu hil in bë mém hil nid gengoin menajom hil ahon mekerë maggin. ⁴ Lob nabë hil najom hil ahon mekerë maggin, og hil rëk natu alam los nid wëek gengaa maggin su rëk kepë hil rë. Lob nabë hil nid wëek nabë saga, og hil rëk abo kwad in ngaa nivesa vesa sën Anutu ggooin rak bë gevong vu hil lo. ⁵ Lob nabë hil abo kwad in ngaa sënë, og Anutu su rëk gevong behil nid namum rë, in vong Anon Vabuung yam vu hil vorot, in bë bër hil kwad jak buk pin nabë Anutu kwa pesivin hil. ⁶ Wirek og hil su ayoh vu bë ǵako hil vér in hil ngaa nipaya

rë, rëk Anutu ggooin buk rak, lob Kerisi diiķ lok yah hil mehönon nid paya lo sënë bed. ⁷ Nabë mehöti nadiiķ in bë dok vu mehö nivesa ti, og hil rëk kenud na in, in su alam ngahisekë denevong nebë saga rë. Yonon, mak alam ti ti deyoh vu bë nij dël jak sir medenadiiķ dok nah mehö nivesa ti ben. ⁸ Rëk mu hil ngo nahën nado los hil ngoaa nipaya, log Kerisi diiķ in bë dok vu hil. Lob Anutu tato rak sënë bë kwa pesivin hil pangsën. ⁹ Om sën nér hil bë hil atu alam yohvu ggovek ya, degwa rak Yesu nikök. Nebë sënë, om gwëbeng hil arak ni yonon bë rëk dok vu hil rot gehil su rëk gako nyéwesen jak hil ngoaa nipaya rë. ¹⁰ Wirek hil ngo nahën medo nasis begö vu Anutu, lok Nalu diiķ lok buk sënë in bë gevong mamer vu hil los Anutu behil medo jevuh ti. Nebë saga lob gwëbeng hil los nado revuh ti, om hil arak ni yonon bë Anutu rëk geko hil nah vu yi behil rëk medo malad-tumsën, in Kerisi nedo mala-tumsën vorot. ¹¹ Lob yiķ su nebë sënë mu rë, gak gwëbeng og hil kwad vesa vu Anutu in hil Mehöböp Yesu Kerisi vong mamer vu hil los Anutu.

*Adam Vong Bemehönon Denediik, Lok Tum Yesu
Vong Om Rëk Demedo Malaj-Tumsën*

¹² Lob hil arak ni bë ngoaa nipaya pum rak mehö timu nyé dahis, lok mëm ngoaa nipaya lo yoh vu dob pin yiķ degwa rak yi. Log diiksën pum rak ngoaa nipaya, lob nevong bemehönon pin denediik. In alam pin denevong ngoaa nipaya. ¹³ Vu buk muginsën Anutu su vo Horen-nemadluho vu mehönon rë, lob vu buk saga ngoaa nipaya neggëp dob vorot. Om lok buk saga

og Anutu su yoh vu bë nanér nabë mehönon denekeyéh horek rë, in Horek su neggëp rë. ¹⁴Rék mehönon dediik lok Adam yi buk beyam verup lok Moses yi buk. Lob diiksën dahun mehönon pin. Rék mu mehönon saga su dekeyéh horek nebë sën Adam keyéh lo rë, in Horek su neggëp lok hir buk saga rë. Rék denediik ving. Lob yiķ mehö sën verup vu tamusën lo vong ngaa ngwë nebë Adam. ¹⁵Rék Anutu yi semusën og bopata rot kesuu ngaa nipaya sën Adam vong lo. In alam ngahisekë denediik rak mehö timu saga yi ngaa nipaya, rék mu Anutu vong mehö timu sën Yesu Kerisi beko yi semusën bopata yam vu hil behil haço nyëmasën. Lob semusën nyëmasën sëne semu alam ngahisekë rot bekesuu diiksën.

¹⁶Lob ngaa nipaya sën verup rak mehö timu agi luho semusën sën hil haço nyëmasën lo, luho hir anon su neggëp ti rë. Gaķ mehö timu sën nekeyéh horek lo, og Anutu seggi yi gagek benér bë mehö nipaya om mehönon rék denadiik bemalaj nama. Rék vu tamusën galam ngahisekë denekeyéh gagek, og Anutu vong yi semusemu nyëmasën yam, lob mëm nér hil bë hil alam yohvu. ¹⁷In vu muginsën mehö timu keyéh horek, rék mehönon pin dediik rak mehö saga yi keyéhsën. Log vu tamusën sagi, og Anutu nér alam pin sën deneko semusën vu Yesu Kerisi nyëmasën lo nebë sir alam yohvu. Om Yesu rék gevong bedenatu alam-los-bengöz medemedo malaj-tumsën geving yi degwata los degwata. ¹⁸In yiķ nebë sënë. Mehö timu vong ngaa nipaya, lob yi nyëvewen yoh vu mehönon pin bë denadiik berék malaj nama. Log yiķ mehö timu vong ngaa yohvu, lob Anutu nér

bë mehönon pin deyoh vu bë denatu alam yohvu medemedo malaj-tumsën jak yi. ¹⁹ Mehö timu keyëh gagék, lob sënë vong balam pin detu alam nij paya. Log yiķ mehö timu sepa lok gagék, lob sënë rëk gevong balam ngahisekë denatu alam yohvu.

²⁰ Log Horek verup ving, lom tato ngaa ni-paya vahi ving bengahisekë lok. Ngaa nipaya ngahisekë lok, rëk mu semusën bögata sënë yam bekesuu ngaa nipaya. ²¹ Yonon, ngaa nipaya tu ala mugin bevongin bë dahun hil behil malad nama. Rëk mu semusën yam in bë kesuu ngaa nipaya begevong mehönon medenatu alam yohvu medemedo malaj-tumsën degwata. Semusën sënë nebë hil Mehöbög Yesu Kerisi diik in hil.

6

Bël-Ripeksën Tahu Bë Hil Adiik Ving Kerisi

¹ Om hil rëk nanér nabë va? Mak hil nanér nabë hil ngo medo gevong ngaa nipaya in Anutu yö medo gevong yi semusën nam vu hil nyëmasën gök gökin-a? ² Ma! Rëk nama! Bë hil atu Kerisi-yi-alam, og yiķ nebë sën hil adiik vorot, om hil su nehebë nengad vu ngaa nipaya benesepa lok ggökin yah rë. ³ Sën hil aripek bël rak Yesu Kerisi arë lo tahu bë hil adiik ving yi gehil atu mewis rak. Ma ham su rak ni rë? ⁴ Nebë saga, om sën hil aripek bël lo tahu sën Kerisi diik medelev lo, gevong bë hil ngaa mugeng diik beneggëp lok söv. Om hil natu mewis jak nabë sën Anutu tato niwëek beKerisi kedi rak vu bedub ggökin betu mewis lo.

Hil Rëk Medo Malaj-Tumsën Geving Kerisi

⁵ Yönon! Hil ngaa mugeng diik ya nebë sën Kerisi diik lo gehil atu yi alam. Nebë sënë, om hil rëk natu mewis nabë sën Kerisi kedi rak ggökin betu mewis lo, behil medo malad-tumsën geving yi.
⁶ Hil arak ni bë vong bë hil ayod mugeng diik ya rak ƙelepeko* ving Kerisi in bë gevong bengaa nipaya niwëek sën nevong huk lok hil navid lo nama na, in hil su sepa dok ngaa nipaya gökin nah.
⁷ In ngaa nipaya og su yoh vu bë kepë mehö sën diik lo gökin nah rë.

⁸ Lob hil ngaa mugeng diik ya ving Kerisi, om hil gevong geving anon nabë hil rëk medo malad-tumsën geving yi. ⁹ In hil arak ni bë Kerisi kedi rak ggökin ggëp bedub, om su rëk nadiik nah gökin rë. Diiksën su yoh vu bë dahun yi gökin rë. ¹⁰ In diik beron timu, lob kevoh hil ngaa nipaya pin ya vorot. Rëk gwëbeng og nedo mala-tumsën beluho Anutu denedo revuh ti. ¹¹ Om ham jak ni rë nabë Yesu Kerisi diik, om yiık vong bë ham diik ving beham su yoh vu bë sepa dok ngaa nipaya gökin nah rë. Gaƙ ham tu Anutu-yi-alam bevong bë ham nedo malamin-tumsën ving yi. ¹² Ham navimin sën rëk petar na lo nevongin bë ham sepa dok ngaa nipaya, rëk mu ham su gurek ngaa nipaya babu megwevong. ¹³ Ham su bo nemamin los vahamin lu ngaa vu ngaa nipaya in gwevong ngaa nipaya gökin nah. Gaƙ ham gwevong navimin pin los anomin dahis vu Anutu in ham nabë mehönon sën dediik ggovek rëk dekedi rak ggökin ggëp bedub medenedo vesaj ggökin yah lo. Geham gwevong navimin pin los dahis vu Anutu in ham gwevong ngaa yohvu mu jak. ¹⁴ Nabë saga lok mëm ngaa nipaya su yoh vu bë kepë ham gökin nah rë. In

gwëbeng og ham su hurek horek babu menesepa lok rë, gak ham nesepa lok Anutu yi gagek semusën sën nevo vu ham nyëmasën lo.

Hil Natu Ngaa Niröpsen Yi Hur

¹⁵ Om hil gevong nabë va? Gwëbeng hil su rëk sepa dok horek in gecko hil nah vu Anutu rë, gak hil nesepa lok Anutu yi gagek semusën sën nevo vu hil nyëmasën lo. Om mak hil ayoh vu bë medo gevong ngaa nipaya ma nama? Ma rot! ¹⁶ Ham rak ni ggovek! Bë ham bo navimin vu mehöti nabë ham gwevong huk vu yi megwevong noh vu aye, og ham tu yi hur. Yiķ nebë saga, om ham su yoh vu bë sepa dok ngaa nipaya genengamin yes vu Anutu geving rë. In ham rëk gwecko nyëvewen dok nah ngaa nipaya beham malamin nama verök yi. Gaķ bë ham nengamin yes vu Anutu, og rëk gevong beham natu alam yohvu. ¹⁷ Hil kwad vesa vu Anutu in wirek ham nesepa lok ngaa nipaya, rëk Anutu vong yi gagek yön vu ham, lob ham nengamin yes benesepa lok los ayomin dahis. ¹⁸ Ngaa nipaya duu ham ahon rëk Anutu ko ham vér in, gevong beham tu yi hur sën denesepa lok ngaa yohvu mu lo. ¹⁹ Rëk ham kwamin su niwëek lok rë geyö nahën, om sën senér mesepa lok hil mehönon ngo kwad. Wirek ham navimin kehe ham beham nesepa lok ngaa nipaya los ngaa sën su neyoh vu rë lo beham kweyéh gagek pangseñ. Om gwëbeng ham dahun ham navimin los dahis, beham sepa dok ngaa yohvu mu in ham ayomin niröp jak.

²⁰ Wirek ham nesepa lok ngaa nipaya, gaķ ham su nesepa lok ngaa yohvu rë. ²¹ Lob vu buk saga

maķ ham neko nyēvewen nivesa nebë va rak ngaa nipaya sën ham nevong lo? Ma! Lob gwēbeng og ham nimin nemum in ngaa nipaya saga, log ham rak ni bē diiksēn tu ham nyēvewen om ham vongin malamin nama! ²² Rēk ma gAnutu ko ham vér in ngaa nipaya bevong ham tu yō yi hur. Lob nyēvewen sën rēk bo dok nah vu ham lo nebë sënē: Ham ayomin niröp jak, lok mēm ham rēk medo malamin-tumsēn degwata. ²³ In alam sën dene-sepa lok ngaa nipaya lo, og rēk degeko nyēvewen dok nah medenadiik bemalaj nama. Rēk Anutu og nevo semusēn vu hil nyēmasēn rak hil Mehöböp Yesu Kerisi yi huk nebë hil medo malad-tumsēn degwata.

7

Paulus Tahu Gagek Rak Maluh Los Venëj

¹ Arig lo, sa nanér gagek sënē vu ham sën neraķ horek ni rot lo nebë: Horek tu ala menegin mehönon yoh vu buk pin sën denedo vesaj lo. Ma ham su rak gagek sënē ni rē?

² Lob yik nebë sënē: Nabë avēh jak regga beregga nahēn nedo, og horek duu luho regga ahon. Rēk nabë regga nadiik, og horek saga maya gesu duu yi ahon rē. ³ Gaķ nabë regga yō nahēn nedo gevenē ya merak maluh ngwē, og horek nenér yi nebë nevong baggēb. Gaķ nabë regga nadiik, og horek sënē su ggērin yi rē, om nabë jak maluh ngwē og su nevong baggēb rē.

⁴ Om arig lo, yik ham nebë sënē. Kerisi lok yah ham bömin mediik in ham, lob sënē vong bē ham diik ving geHorek su negin ham ggökin rē, om ham

yoh vu bë jak vu reggamin mewis. Ham reggamin mewis saga yiķ mehö sën kedi rak yah vu bedub ggökin in bë gevong behil gevong Anutu yi huk banon jak lo. ⁵ Wirek hil ngo nahën nesepa lok ngaa nipaya sën hil malad anonin los navun hil in lo, lok horek nérin ngaa nipaya sënë, rëk mu sënë vong behil kwad nevo bë hil pasang gevong rot. Hil nehevong rot, lob ngaa nipaya saga yi nyëvewen neggpëp bë hil rëk nadiik bemalad nama. ⁶ Rëk vong bë hil adiik ving Kerisi, om ko hil vér in Horek sën neduu hil ahon wirek lo, in bë su gegein hil gökin. Gak wirek, og hil nesepa lok Horek sën dekevu meneggëp lo, rëk mu gwëbeng og hil atu mewis rak menesepa lok ngaa sën Anon Vabuung netato vu hil lo.

Ngaa Nipaya Nevasap Hil

⁷ Om hil rëk nanér nabë va? Hil nanér nabë Horekek ngaa nipaya? Ma! Nabë Horek su tato ngaa nipaya vu sa rë, og sa su rëk jak ni nabë nipaya rë. Bë Horek su nanér nabë, “Su ayom nevu nevu in mehö ngwë hir ngaa” rë, og sa su rëk jak ayoğ nevu nevu sënë ni nabë ngaa nipaya rë. ⁸ Rëk Horek saga tatekin aggata vu ngaa nipaya benepelépin sa, lob vong besayog nevu nevu in ngaa nipaya aggagga. Gak bë Horek nama, og ngaa nipaya nebë heljeng, in sa su rëk galë nabë ngaa nipaya rë. ⁹ Wirek sën sa dugin Horek lo, og sa hekuung bë sa nado nivesa. Lok tum serak Horek ni, lob ngaa nipaya vesa lok yah vu sa, lob serak ni bë sëk nadiik bemalağ nama. ¹⁰ Anutu vong Horek yam in bë geli sa na niröp besa medo malağ-tumsën, rëk mu ma geHorek

tato vu sa bë sëk nadiiķ bemalaġ nama. ¹¹ In Horek nér aggata tato vu ngaa nipaya, lob ngaa nipaya tetuhin sa, lob seraķ ni bë sëk nadiiķ bemalaġ nama. ¹² Nebë sënë, om hil arak ni bë Horek yö vabuung. Lob Horek yi gagek pin vabuung ving beniröp genivesa. ¹³ Ma mak Horek nivesa sënë vong besék malaġ nama? Ma! Ngaa nipaya mu sën kepë sa, om sëk malaġ nama. Yik nebë sënë in bë nanér ngaa nipaya tato nabë ngaa nipaya rot. Ngaa nipaya neko Horek nivesa sënë in bë kepë sa jak besa malaġ nama. Lob Horek nenér ngaa nipaya degwa tato vu sa bë ngaa nipaya yönö.

Ngaa Nipaya Neggërin Hil Kwad

¹⁴ Hil arak ni bë Horek sënë vabuung in yam vu Anon Vabuung. Gaķ sa, og ngaa muğeng neggëp lok sayog besa nahurek ngaa nipaya babu. ¹⁵ Yönon, sa su narak ngaa sën sa nehevong lo degwa ni rë. Gaķ ngaa sën sa nehevongin pangśën bë sa gevong lo, og sa su nehevong rë. Rëk ngaa sën sa niġ nelēlin verök yi lo, og tum sa nehevong yoh vu buk pin. ¹⁶ Gengaa sën sa bë gevong in seraķ ni bë ngaa nivesa lo, og saga nebë serak Horek ni beseyogégekin bë ngaa nivesa, rëk mu sa su nehevong yoh vu rë. ¹⁷ Rëk su sengo ti nehevong ngaa nipaya sënë rë, gaķ ngaa nipaya sën nedo lok sayog lo sën yö nevong. ¹⁸ In seraķ ni bë ngaa nivesa ti su neggëp lok sayog rë. Sa nanér ngaa muğeng sën neggëp lok sayog lo. In sa nehevongin bë gevong ngaa nivesa, rëk ma gesa su yoh vu bë gevong banon jak rë. ¹⁹ Gaķ ngaa nivesa sën sa nehevongin bë gevong lo, og sa su nehevong rë. Gengaa nipaya sën sa su nehevongin bë gevong rë

lo, og tum sa nehevong. ²⁰ Sa nehevong ngaa sën sa su kwaǵ nevo bë sék gevong rë lo, rëk sa su ngo nehevong rë, gak ngaa nipaya sën nedo lok sayog lo yö nevong.

²¹ Lob sa nehevong nebë sënë rak buk pin: Sa nehevongin bë gevong ngaa nivesa, rëk ma gengaa nipaya nedo lok sayog benepebip sa. ²² Yonon, sahëg neving Anutu yi horek pangsen lok sayog. ²³ Rëk sa halë horek ngwë neggëp lok sa navig pin. Lob nesis begö vu Anutu yi horek sën neggëp lok sayog lo. Log netung sa lok ya ngaa nipaya sën nedo lok sa navig agi nema beneduu sa ahon. ²⁴ Wöp-o! Lob sa mehö nig paya rot! Maǵ re rëk bo sa vër in ngaa muǵeng sën rëk gevong besa malag nama agi? ²⁵ Om sa kwaǵ vesa rot vu Anutu! In vong hil Mehöbop Yesu Kerisi yam in bë geko sa vër. Yonon, sa kwaǵ og nesepa lok Anutu yi horek, rëk sa ngaa muǵeng sën nedo lok sayog lo, og nesepa lok ngaa nipaya yi aggata beluho denepemëgin sir.

8

Kerisi Dahun Ngaa Nipaya Ya Gevong Anon Vabuung Vu Hil

¹ Nebë saga, om hil sën naha rak Kerisi Yesu lo, og gagek sën nér bë hil gako nipaya nyëvewen lo ti su rëk gëp vu hil rë. ² In Anon Vabuung yi horek nér bë alam degevong ngaa nipaya, og denadiik bemalaj nama. Log nér ving bë hil atu Kerisi Yesu yi alam lo, og hil su rëk nadiik bemalad nama rë, gak hil rëk medo malad-tumsen degwata. ³ Ngaa muǵeng neggëp lok hil ayod, om Horek su yoh vu

bë kevo h ngaa nipaya na rë. Rëk ngaa sën Horek su yoh vu bë gevong rë lo, og Anutu yö nevong. Vong nalu yam betu mehönon rak, benavi nebë hil mehönon nid paya vu dob sënë navid.

Lob Anutu vong bemehönon hir ngaa nipaya nyëvewen yah rak neggëp Kerisi, bediik lok yah hil bed in bë Horek yi nyëvewen su gëp vu hil.⁴ Horek nér bë hil gaço nyëvewen dok nah hil nipaya, lob sagak nér niröp beyoh vu. Rëk Anutu vong beKerisi diik lok yah hil bed besis hil nyëvewen bemaya, om hil su rëk malad nama rë. Hil su nesepa lok ngaa mugeng sën nedo lok hil ayod lo rë, gak hil nesepa lok Anon Vabuung yi aggata om sën vong nebë sënë vu hil.⁵ In alam sën ngaa mugeng nedo lok ayoj lo, og kwaj neya vu ngaa dob yi mu. Gak alam sën denesepa lok Anon Vabuung lo, og kwaj neya vu Anon Vabuung yi ngaa.⁶ Nabë mehöti kwa na vu ngaa mugeng mu, og mehö sënë rëk nadiik bemala nama. Gak nabë mehöti kwa na vu Anon Vabuung yi aggata, og mehö sënë rëk ayo gëp revuh in rëk medo matalumsën.

⁷ Log nabë mehöti kwa sepa dok ngaa mugeng mu, og mehö sënë nesis begö vu Anutu. In su neggurek Anutu yi horek babu rë, gesu yoh vu bë gevong noh vu rë.⁸ Alam sën denesepa lok ngaa mugeng lo, og alam nebë sënë su deyoh vu bë degevong bAnutu kwa vesa in sir rë.⁹ Rëk hamek su nesepa lok ngaa mugeng rë. Gak Anutu yi Anon Vabuung nedo ving ham yönö beham nesepa lok. Rëk nabë Kerisi yi Anon Vabuung su nedo ving mehöti rë, og su Kerisi-yi-alam yi rë.¹⁰ Yönö, ham navimin nediiķ, in ham nevong ngaa nipaya, rëk

mu nabë Kerisi nedo ving ham, og ham tu alam yohvu meham anomin nedo mala-tumsën.

¹¹ Anutu nér beYesu kedi rak ggökin vu bedub. Om ham navimin rëk nadiik mepetar na rëk mu nabë Anutu yi Anon Vabuung nedo lok ham ayomin, og Anutu sën nér meYesu kedi rak yah lo rëk gevong bAnon Vabuung bo mala-tumsën vu ham navimin geving.

Anon Vabuung Nevong Behil Natu Anutu Nalu

¹² Arig lo, hil ngaa mugeng su nesemu hil rë, om hil su ağurek babu besepa dok. ¹³ Gak nabë ham sepa dok ngaa mugeng, og ham rëk nadiik be-malamin nama. Rëk nabë ham gweko niwëek vu Anon Vabuung bedok vu ham beham nimin dëlin ngaa nipaya sën ham navimin bë gevong lo, og ham rëk medo malamin-tumsën. ¹⁴ Alam pin sën deneggurek Anutu yi Anon Vabuung babu lo, og Anutu nalu sir. ¹⁵ In Anutu su vong Anon Vabuung yön vu ham in bë deginengin ham beham medo megöneng in yi rë. Gak vong yön vu ham in bë ham jak ni nabë ham tu Anutu nalu. Lom nevong behil ayed nelok yi bë, “Amag! Amag!” ¹⁶ Yonen, Anon Vabuung nenér rangah vu hil lok hil ayod bë hil atu Anutu nalu. ¹⁷ Hil atu Anutu nalu, om hil rëk medo ben geving yi, geyi ngaa pin rëk natu hil ngaa geving. Kerisi ko vanë wirek, lob hil atu yi alam menehako vanë nebë saga gwëbeng ving in bë hil medo nivesa rot geving yi vu tamusën, gAnutu yi ngaa nivesa vesa pin rëk natu hil los Kerisi hil ngaa.

Hil Medo Nivesa Rot Vu Tamusën

¹⁸ Sa kwaġ nevo bë vu tamusën sën hil ana medo nivesa lo, og mëm hil rëk galē ngaa maggin sën netök vu hil gwëbeng agi nabë ngaa meris. ¹⁹ In ngaa pin sën Anutu tung lo ggëp denegin buk sën Anutu tato nalu lo pin nam rangah lo. ²⁰ In ngaa pin sënë yō nahën denedo paya, rëk su nebë sënë yoh vu yō kwaj rë. Gak Anutu yō tung sir nebë sënë, om denevo kwaj in buk sën ngaa pin nijvesa jak los dahis lo. ²¹ Anutu rëk geko ngaa pin sën netung lo vér in ngaa sën nevasap sir benevong bemalaj nema ya gwëbeng agi, berëk semu ngaa pin benijvesa jak bedemedo nijvesa rot geving nalu lo pin. ²² Hil arak ni bë ngaa pin sën Anutu tung lo medo denevo belol medenevimengin ngaa maggin, nebë sën avëh denevimeng lo, yō vu wirek rot begwëbeng.

²³ Lob su ngaa nebë sënë mu rë. Gak hil sën hil hačo Anon Vabuung vorot lo, og yiķ hil navo belol ving menehegin buk sën Anutu gevong behil natu nalu lo yönöñ lo. Sën hil natu nalu lo nebë: Gečo hil navid bër vu dob los ngaa nipaya. ²⁴ Anutu ḁo hil yah vu yi ggovek ya, rëk hil nahën navo kwad in buk sën gevong banon jak lo. Gak bë berup govek na, og hil su rëk abo kwad in gökin nah rë, in mehöti su nevo kwa in ngaa sën netök yam ggovek ya lo ggökin rë. ²⁵ Rëk ngaa sën yō nahën gesu anon nerak rë lo, nabë hil gevong geving rot nabë rëk anon jak vu hil, og hil najom hil ahon gemedo navo kwad in.

²⁶ Log nelok buk sën hil su nayoh vu bë kwad bo gaġek menajom jak niröp rë lo, og Anon Vabuung nelok vu hil. Yönöñ, Anon Vabuung nejom rak in hil rak saheng mu, in hil su ayoh vu bë nanér gaġek

sagi berup hil avid rë. ²⁷ Gehil Amad sën nelë mehönon ayoj lo neraķ Anon Vabuung yi gagek sagi ni, generaķ ni bë Anon Vabuung nesepa lok Anutu kwa menelok vu hil sën Anutu-yi-alam hil lo.

²⁸ Log hil naraķ ni bë ngaa pin sën netök vu alam sën ahēj neving Anutu lo, og yiķ Anutu nevong ngaa pin sënë nevong huk lok ti in bë gevong nivesa vu sir. Yiķ nevong vu yi alam pin sën ggooin sir rak yoh vu yö kwa lo. ²⁹ In Anutu ggooin sir rak vorot wirek betato sir in bë nij nabë Nalu, lob Nalu natu arij aguu, gari lo ngahisekë. ³⁰ Lob alam sën tato sir wirek lo, og supin sir yah vu yi. Lob alam sën supin sir yah vu yi agi, og nér sir ving bë sir alam yohvu. Lob alam sën nér sir bë sir alam yohvu lo, og nér bë rëk demedo nivesa rot geving yi.

Anutu Kwa Pesivin Hil Om Su Rëk Gevuu Hil Rë

³¹ Om hil rëk nanér va jak ngaa pin sën Anutu nevong-ë? Nabë Anutu dok vu hil, og mehöti su yoh vu bë kepë hil rë! ³² In su ggulin Nalu rë, gak vong yam in bë dok vu hil pin. Vong ngaa bögata saga vu hil, om mak rëk gevong yi ngaa vahi pin vu hil nyemasen geving. ³³ Om re yoh vu bë gevong gagek jak alam sën Anutu yö ggooin sir rak vorot tu yi ngaa lo? Ma! Anutu nér hil bë hil alam yohvu. ³⁴ Ma re rëk nanér nabë hil mehönon nid paya? Mak Kerisi? Ma! Kerisi og lok yah hil bed bediik in hil ggovek ya. Log kedi rak yah ggökin vu bedub menedo Anutu nema vesa, beneketağ vu Anutu ving bë dok vu hil.

³⁵ Log re yoh vu bë bo hil vër in Kerisi ahëvingsën sënë? Ma! Rëk mu nabë maggin natök vu hil ma, nabë hil kwad na ngahi ma, nabë hil gaço vanë, ma, nabë meyip gevong hil ma, nabë hil ajak vu in tob ma, ngaa nipaya basap hil ma, begö natök vu hil, og rëk nabë va? Maň Kerisi su ahë neving hil rë? Gaň ahë neving hil! ³⁶ Yonon, ngaa nebë sënë netök vu hil yoh vu gagek sën neggpël lok Anutu-yi-kapiya lo bë:

“Denesis he mehe nadiiň yoh vu buk pin in he tu hong alam.

Denelë he nebë sipsip, om sën denesis he mehe nadiiň ya.”

³⁷ Rëk mu yiň ngaa pin sënë og ngaa meris. In Kerisi ahë neving hil menevong behil kesuu menare nid wëek. ³⁸ In sa hevong ving rot bë ngaa ti su yoh vu bë bo hil vër in Anutu ahëvingsën sënë rë. Nabë hil nadiiň ma hil medo vesad, og su yoh vu bë bo hil vër rë. Log angér los ggev-dobyi gengaa sën nedo gwëbeng agi los ngaa sën rëk berup vu tamusën ma, niwëek aggagga vahi ma, ³⁹ ngaa sën nedo yagek babu lo los ngaa sën nedo dob gebinë lo, ma ngaa vahi sën nedo jeggin jeggin agi. Ngaa pin nebë sënë, og su deyoh vu bë dedok Anutu ahë bepekwë gagek sën ahë neving hil-ë rë. Gaň vong hil Mehöböp Yesu Kerisi yam in bë tato rangah nabë ahë neving hil.

9

Paulus Ayo Maggin In Alam Israel

¹ Ngaa sën senér lo og yonon, gak sa su tetuhin rë, in Kerisi-yi-alam sa. Log Anon Vabuung tatekin

vu sa lok sayog ving bë senér gagek sënë yönöñ.
² Sa nanér vu ham nabë: Sayog maggin gesa kwağ paya rot yoh vu buk pin. ³ Yönöñ, nabë yoh vu bë sa basap sa in mém sa gaço sa alam Israel denah vu Kerisi jak sën sa hetah sa vër in Kerisi-yi-alam gesa malag nama na verök yi lo, og sëk kwağ vesa in megevong nabë sënë. Rëk ma gesaga su yoh vu bë rëk dok vu sir rë. ⁴ Sir alam Israel soğek bedetu Anutu nalu lo, log denelë nikapiik rak malaj ving, log Anutu joo yi gagek ving sir gevo yi horek vu sir. Getato aggata sën degetung seriveng in bë dekevoh hir ngaa nipaya los degekö arë jak lo vu sir. Log nér yi gagek vahi vu sir bë rëk gevong vu sir geving. ⁵ Alam Israel sënë og alam böp böp wirek hen hir mewis sir, lob Kerisi sën tu ngaa pin ala lo pum rak sir, rëk mu yi Anutu soğek, sën hil gaço arë jak na vavunë degwata los degwata lo yönöñ.

Anutu Ggooin Yi Alam Rak

⁶ Rëk mu hil su nanér nabë: Anutu hen gagek anon ma. Hil su nanér nabë saga in alam sën depum rak Israel lo, og sir pin su Israel soğek rë. In sir vahi su denesepa lok Anutu rë. ⁷ Alam sën depum rak Abraham nikök lo, og su sir pin detu yi mewis yönöñ rë. In Anutu nér vu yi wirek bë, “Rëk denanér Isaak yi mewis mu nabë hong alam.” ⁸ Nebë sënë in nalu lo sën depum rak nikök mu lo, og su detu Anutu nalu rë. Gaç hurmahen sën depum rak gagek sën Anutu joo lo, og mém hil nanér sir nabë Abraham yi mewis soğek. ⁹ Gagek sën Anutu joo lo nebë, “Sëk nom geto dok buk sën

sehooin rak̄ lo, lom mēm Sara rēk gēko nalu maluh ti.”

¹⁰ Log yīk su gagek timu sēnē rē. Gak hil dobahē Isaak Ɂo Rebeka, lob nalu luu lok pepid, lob Anutu nēr gagek ti vu Rebeka vorot. ¹¹ Luho nahēn denare lok ataj ayo gesu denevong ngaa nivesa ma ngaa nipaya ti rē, rēk Anutu nēr gagek rak̄ luho vorot in bē tato rangah nabē su nelē ngaa sēn denevong lo menenēr rē, gak̄ yō neggooin mehönon rak̄ yoh vu kwa. ¹² Nēr vu Rebeka bē, “Aguu rēk gurek amon babu!” ¹³ Sēnē yoh vu gagek sēn neggpēp lok̄ Anutu-yi-Ɂapiya lo nebē, “Sahēg neving Yakop, rēk sa nehalē Esau paya.”

¹⁴ Om hil rēk nanēr nabē va? Māk hil nanēr nabē: Anutu su nevong ngaa yohvu rē? Ma! ¹⁵ In nēr vu Moses bē:

“Nabē sa hevongin bē semu mehöti, og sēk semu.

Log nabē sa hevongin bē kwaḡ paya in mehöti, og sēk kwaḡ paya in.”

¹⁶ Om yīk nebē sēnē. Anutu su kwa paya in mehöti in mehö sēnē kwa nevo bē Anutu kwa paya in yirē. Log su kwa paya in mehöti in nevong Anutu yi huk niwēēk rē, gak̄ yō nevong yoh vu kwa. ¹⁷ In Anutu nēr vu Parao wirek meneggēp lok̄ yi Ɂapiya nebē, “Maggin sēn sa hevong vu honḡ lo, og sa hevong in bē tato sa nīg wēēk vu mehönon pin in denanēr sa bengög na menoh vu dob pin. Yīk rak̄ degwa saga sēn sa hetung ggev Parao rak̄ honḡ.” ¹⁸ Om nabē Anutu kwa bo nabē kwa paya in mehöti, og rēk kwa paya in yi. Log nabē kwa nevo bē gevong bemehöti ayo dahis jak̄, og rēk gevong bayo dahis jak̄.

Anutu Yi Kwa-Vonginsën Los Ahë Sengën

¹⁹ Rëk mu mak ham ti rëk nanër vu sa nabë, “Nebë saga, lok nebë va sën Anutu nenér bë ngaa nipaya degwa neggp vu hil mehönon-ë? In hil su ayoh vu bë ƙeyeh yi rë.” ²⁰ Rëk hong re? Hong mehönon mu rëk geyoh vu bë gwevong ayem jak Anutu? Dëg sogek su nelok tepék in ala sën nejegwi yi lo bë, “Genesemu sa nebë sënë in va?” rë. ²¹ Gak mehö sën nejegwi dëg lo yö nejegwi yoh vu kwa, log yoh vu bë geko ngagék gobeng timu mejegwi dëg luu jak. Lob nabë semu ngwë malangeri in huk nivesa yi, log semu ngwë in bë huk meris meris yi, og yiƙ gbovek. Yö yi ngaa.

²² Lob Anutu vongin bë tato ahë sengën rangah betatekin niwëek vu mehönon in sir pin denevong ngaa nipaya. Lob ahë sengën vu sir bë kevoх sir bemalaj nama na verök yi, rëk ma genejom yi ahon. ²³ Nejom yi ahon nebë saga in kwa nevo mehönon vahi sën kwa nevongin sir lo. Kwa nevo sir in yö ggooin sir rak vorot in bë demedo nivesa dok yi nyéğ geving yi, gerék gevong yi ngaa nivesa vesa pin vu sir. ²⁴ Yiƙ hil sënë. Ggooin hil rak. Su ggooin lok he Yuda mu rë, gak ggooin alam-yu-ngwë vahi ving. ²⁵ In Hosea nér nebë saga meneggp lok Anutu-yi-ƙapiya nebë:

“Alam sën su sa alam sir wirek rë lo, og sëk nanër sir nabë salam sir.

Galam sën sa su ahéğ neving sir wirek rë lo, og sëk ahéğ geving sir.”

²⁶ Loga,

“vu nyéğ sën sa nanër sir wirek bë,
‘Su salam ham rë’ lo,

og sëk nanër vu sir saga nabë Anutu mala-tumsën
nalu sir.”

²⁷ Log Yesaya nér rak alam Israel getahi bë:
“Nabë Israel ngahijsekë rot nabë raggér loo nenga,
og yik Anutu rëk gecko sir yu mahen teka mu
nah vu yi.

²⁸ In Mehöböp rëk govek gagek na gebepul pevis,
log bo nyévewen dok nah vu alam vu dob.”

²⁹ Yoh vu gagek ngwë sën Yesaya nér wirek lo bë:
“Nabë Mehöböp sën negin angér-beğö-yi pin vu
yagek lo

su yoh nenga in hil hed vë yu mahen teka
bedemedo rë,

og hil rëk malad nama na verök yi
nabë sën Sodom los Gomora.”

Alam Israel Denevong Huk Mu In Bë Denatu Alam Yohvu Rëk Ma

³⁰ Om hil rëk nanër nabë va? Hil nanër nabë
alam-yu-ngwë sën su malaj nesepa bë denatu
alam yohvu rë lo detu alam yohvu. Ayoj ya timu
vu Yesu lom sën Anutu nér sir bë sir alam yohvu.

³¹ Gaç alam Israel og kwaj nevo bë nabë desepa
dok horek, og rëk gevong medenatu alam yohvu.
Rëk ma gesu denesepa lok horek los dahis rë.

³² Rëk su detu alam yohvu rë, in su ayoj neya
timu vu Yesu rë. Gaç kwaj nevo bë ngaa sën
denevong lo yoh vu bë rëk gecko sir nah vu Anutu,
rëk ma. Denelë kelepeko* nebë su yoh vu rë, in
ngaa nimumsën, lob sënë nebë sën deketul vahaj
raç gelöng bedevës. ³³ In gagek sënë neggëp lok
Anutu-yi-ķapiya bë:

“Ham ngo! Sa hetung gelöng ti vu Sion* in bë
mehönon deketul vahaj jak.

Sa hetung gelong niwëek ata in gevong rii jak mehönon.
 Gak alam sën ayoj na timu vu yi lo, og su rëk nij namum rë.”

10

Alam Israel Su Detu Alam Yohvu Rë

¹ Arig lo, sa hevongin rot bë Anutu geko alam Israel nah vu yi, om sa najom rak vu yi in sir rot. ² Seraq nij, om sën senér bë nij wëæk rot bë desepa dok Anutu. Rëk su denevong los kwaj rë. ³ In deneketul lok in aggata sën Anutu nanér sir nabë sir alam yohvu lo, in denevong ngaa yoh vu yö kwaj in bë denatu alam yohvu. Su denedahun sir medenesepa lok aggata sën Anutu vong in bë hil sepa dok menatu alam yohvu lo rë. ⁴ Hil arak ni bë Horek yi huk verup lah lok Kerisi, om sën Anutu rëk nanér alam pin sën ayoj na timu vu Kerisi lo nabë sir alam yohvu.

Anutu Nevongin Bë Geko Alam Pin Nah Vu Yi

⁵ Yiķ nebë sën Moses kevu gagék rak Horek bë: Horek yoh vu bë gevong mehönon medenatu alam yohvu lo. Kevu nebë sënë, “Mehöti bë sepa dok horek sënë pin, og rëk medo mala-tumsën.” ⁶ Rëk mu hil ayod neya timu vu Yesu, lom sën vong behil arëd nebë hil alam yohvu, om ham su kwamin bo dok ayomin nabë, “Re rëk dok na yagek, megeko Kerisi duķ nam-a?” In hil arak ni bë luk yam ggovek ya. ⁷ Log su kwam bo nabë, “Re rëk duķ na alam-diiksën hir nyég in geko Kerisi nom-a?” Gak kedi rak yah ggovek ya.

⁸ Log gerāk ni ving bē, “Gagek yīk neggëp vu hong. Neggëp lok avim geneggëp lok ayom.” Yīk gāgek sēn hil nanér rangah bē hil ayod neya timu vu Yesu lo. ⁹ Om nabé̄ genanér̄ Yesu berup avim nabé̄ yi Mehöböp, log gwewong geving dok ayom nabé̄ Anutu nér̄ bekedi rak̄ yah vu bedub, og Anutu rēk geko hong nah vu yi. ¹⁰ In hil atu alam yohvu rak̄ sēn hil ayod neya timu vu Yesu lo, log Anutu rēk geko hil nah vu yi jak̄ sēn hil nanér̄ verup avid bē yi alam hil lo.

¹¹ Lob gāgek neggëp lok Anutu-yi-kāpiya nebē, “Alam sēn ayoj na timu vu yi lo, og su rēk juuk sir benij namum rē.”

¹² Log alam Yuda los alam-yu-ngwē neggëp timu in yīk hil pin hil Mehöböp timu nedo, lob nevong semusēn bōpata vu alam sēn ayej nelok yi lo. ¹³ Yoh vu sēn neggëp lok Anutu-yi-kāpiya lo nebē, “In alam sēn ayej nelok Mehöböp lo pin, og rēk geko sir nah vu yi.” ¹⁴ Rēk nabé̄ su ayoj na timu vu yi rē, og su rēk ayej dok yi rē. Log nabé̄ su degenḡ yi gāgek rē, og su rēk ayoj na timu vu yi rē. Log nabé̄ mehöti su nanér̄ yi gāgek rangah vu sir rē, og su rēk degenḡ rē. ¹⁵ Log nabé̄ Anutu su gevonḡ alam sēn denanér̄ gāgek lo dena vu sir rē, og re rēk nanér̄ rangah vu sir-a? Yoh vu gāgek sēn neggëp lok Anutu-yi-kāpiya lo nebē, “Alam sēn denanér̄ Bengö Nivesa rangah lo deberup, og hil kwad vesa rot.”

Alam Israel Su Denesepa Lok Bengö Nivesa Rē

¹⁶ Rēk mu alam pin su debē nengaj vu Bengö Nivesa rē gema. Yoh vu sēn Yesaya nér̄ wirek lo nebē, “Mehöböp, re vong ving gāgek sēn he

nanër lo?” ¹⁷ Om hil nehevong ving rak gagek sën hil nehango lo, lob gagek sën hil nehango lo, og neverup rak Kerisi avi. ¹⁸ Rék selok tepék bë: Maķ su denengo Bengö Nivesa sënë rë? Gaķ deningo ggovek ya. In gagek neggëp lok Anutu-yi-kapiya nebë:

“Ayej ya meyoh vu dob pin.

Log hir gagek ya metök ya dob nenga pin.”

¹⁹ Rék selok tepék beron ngwë ggökin bë: Mak Israel su derak gagek sënë degwa ni rë? Gaķ derak ni in Moses nér wirek bë:

“Sék gevong beham ayomin rék ngis yi in alam-yu-
ngwë sën su los bengöz rë lo,

log sék gevong beham ahëmin sengën vu alam-
yu-ngwë sën kwaj masën lo.”

²⁰ Rék Yesaya su neggoneng rë genenér rangah bë:

“Alam sën su denesero sa rë lo detök vu sa,

log alam sën su denelok tepék in sa vu mehö
la rë lo,

og sa tato sa rangah vu sir.”

²¹ Lob nér rak Israel nebë:

“Sa hetë nemag in alam sën denekeyëh los deme-
hoo sa gagek lo

yoh vu buk pin bë denom vu sa, rék ma.”

11

Anutu Semu Alam Israel Vahi

¹ Lob sa bë dok tepék in gagek ngwë nabë mak Anutu ruuk yi alam-a? Ma verök yi! Yik sa Israel ti ving. Abraham yi mewis sa, in sa degwa vu Benyamin.

² Log Anutu su rëk juuk yi alam sën ggooin sir rak wirek lo rë. Ma ham su rak gagek sën Anutu-yi-kapiya nér rak Elia lo ni rë? Elia su vu Anutu in alam Israel bë, ³ “Mehöbop! Denesis hong alam-denenér-gagek-rangahsën medenediik. Gedenkevoh hong jepö ya. Geyik senço ti nahën nado, lob denesero sa in bë dengis sa mesa nadiik.” ⁴ Rëk Anutu nér yah vu yi nebë va? Nér nebë sënë, “Sehooin alam 7,000 rak medenedo vu sa, su deneggurek anutu-kuungsën Baal babu rë.”

⁵ Lob yiň buk sën gwëbeng agi nebë ving. Anutu kwa pesivin alam Israel beggooin sir yu mahen teka rak medenedo. ⁶ Ggooin sir rak in yö kwa pesiv in sir, gak su ggooin sir rak in denevong huk nivesa la rë. Gak nabë ggooin sir rak in nelë bë denevong ngaa nivesa, og nevong lok yah nyëvewen vu sir mu gesu kwa pesiv in sir yönöñ rë. ⁷ Om mak nebë va? Nebë sënë: Alam Israel malaj nesepa bë Anutu gelë sir nivesa, rëk ma gesu nelë sir pin nivesa rë. Yönon, ggooin sir yu mahen teka rak benelë sir nivesa, rëk sir vahi pin og nengaj nemir, om su detök rak gagek anon rë. ⁸ Yoh vu gagek sën neggëp lok Anutu-yi-kapiya lo bë:

“Anutu vong benij tebö nebë sën deneggëp yiing. Nevong malaj bë degelë yi gagek rëk su dejak ni,

genevong nengaj bë degengo rëk su denatök jak degwa.

Lob denedo nebë sënë rot meverup gwëbeng.”

⁹ Log Davit nér rak Israel ving bë:

“Hir nos böp sën denegga lo rëk natu gegweeng los rasoh
in kevoh sir mebo nyëvewen vu sir.

10 Malaj kenu dok gesu degelë ngaa,
lom hir ngaa mugeng saga yo jał gëp demij
meyö gëp degevek degwata.”

Anutu Ko Alam-yu-ngwë Yom

11 Lob sa bë dok tepék in gagek ngwë nabë: Alam Israel devës saga, om rëk malaj nama na verök yi? Ma! Rëk nama! Dekeyéh gagek lob tum Anutu ko alam-yu-ngwë yom rak sënë. Vong nebë sënë in bë alam Israel ayoj ngis yi, lob mëm degérin sir nom vu yi geving. **12** In dekeyéh gagek lom sënë lok vu mehönon pin. Deruu demij vu Anutu, lob sënë vong bengaa nivesa tök vu alam-yu-ngwë. Om alam Israel degérin sir nom vu Anutu, og sënë rëk gevong bengaa nivesa rot natök vu mehönon pin mekesuu ngaa sën verup rak hir keyëhsën lo.

13 Sa bë nanër gagek vu ham alam-yu-ngwë: Ham sinarë sa, lob sa kwag vesa in huk sënë menehevong. **14** Sa nehevongin huk sënë rot in bë gevong mesa alam Yuda malaj anonin ngaa nivesa vesa sën ham neko lo, in sa gako sir la denom geving. **15** In Anutu semu aye in mehönon rak sën ruuk alam Israel lo. Om buk sën Anutu geço alam Israel nom gökin lo, og rëk nabë sën dekedi rak yah ggökin ggëp bedub. **16** Alam Israel deneko parawa-brët-yi nemaj beron ti vér nemugin medenetung netu seriveng vu Anutu lob mëm brët pin los dahis netu yi ngaa ving. Log nabë kele gega* tu Anutu

* **11:16:** Gagek sënë rak parawa-brët-yi los kele gega, og yiğ gagek peggirinsën rak Abraham losho yi mewis. Bë Abraham tu Anutu yi alam, om yi mewis pin detu Anutu yi alam ving nebë saga. Rëk alam Israel ngahi deruu demij vu Anutu bedekehe sir vér in yi alam

yi ngaa, og kele nema pin los agga tu yi ngaa ving. ¹⁷ Yönon, mak Anutu keyeh kele oliv* nema vahi bevo vër, log ko hong nebë kele oliv* bemën nema ti megelu hong lok yah nema vahi sagu lo bej. Lob geneko jeji ggëp kele oliv* sënë gëga ving nema sogek vahi lo. ¹⁸ Om su gweko hong jak vu nema sogek lo. Nabë gweko hong jak vu, og kwam bo rë. In genare rak gëga, gak gëga su nare rak hong rë. ¹⁹ Rëk mu mak rëk genanér nabë, “Anutu keyeh nema pin sënë in bë gelu sa dok nah bej.” ²⁰ Sënëk yönö, rëk mu ketöv sir in su ayoj neya timu vu Yesu rë. Gak hongek genare niwëek in ayom neya timu vu yi, om su gweko hong jak. Gak gegöneng megwegin hong. ²¹ In Anutu su lë nema sogek mu menedo rë, om su rëk gelë hong mu geving rë. ²² Kwam bo Anutu rë, nabë yi mehö kwa vonginsën los mehö niwëek ving, om su nelë ngaa nipaya mu rë. Alam sën nij nelëlin yi lo, og nevong nyëvewen vu sir lok yah. Log hong, nabë gegurek babu, og rëk kwa gevongin hong, gak nabë nama, og rëk ketöv hong na geving. ²³ Om nabë nema sogek sën nij nelëlin yi lo vahi degerin sir nom bayoj na timu vu Yesu, og Anutu rëk gelu sir dok nah aggaj gökin. In Anutu yoh vu bë gevong nabë saga. ²⁴ Gerak ni bë wirek og kele oliv* bemën nema hong, rëk Anutu ketöv hong vër megelu hong lok yah oliv* nivesa, gak su aggam sënë niröp rë. Om yönö rot, yoh vu bë rëk geko oliv* sogek nema lo sënë megelu sir dok nah yö aggaj gökin.

Anutu Kwa Nevongin Mehönon Pin

²⁵ Arig lo, sa bë ham su kwetul dok in gagek vunsën sënë. In rëk ham kwamin bo menanër ham nabë ham los kwamin. Om sa nanér gagek vunsën sënë rangah vu ham. Gagek sënë degwa nebë: Alam Israel vahi nengaj dahis, lob demedo nabë sënë rot mena berup dok buk sën Anutu gooin alam-yu-ngwë jak govek na bedegérin sir nom lo.

²⁶ Lob mëm Anutu rëk geko Israel vahi pin nom noh vu gagek sën neggëp lok yi kapiya lo bë:

“Mehö sën dok vu hil megeko hil vér lo rëk berup gëp Sion*.

Lob rëk kevoh Yakop yi mewis hir ngaa ni-paya sën deneruu demij vu Anutu lo na.”

²⁷ Log yi gagek ngwë nér bë:

“Sëk najoo gagek sënë jak sir nabë
sëk kevoh hir ngaa nipaya pin na.”

²⁸ Alam Israel nij nelëlin Bengö Nivesa, lob de-nesis begö vu Anutu in ngaa sënë, rëk mu saga nelok vu ham. Rëk mu Anutu ggooin sir rak vorot in denatu yi alam, om sën nahën ahë neving sir. In kwa nevo kenuj los hir dobahë lo. ²⁹ In nabë Anutu gooin alam yu ti jak begevong semusën vu sir, og su rëk nom pekwë gagek rë. ³⁰ Wirek ham kweyëh Anutu aye, rëk ma geham wërin ham yom, lom ham ko semusën gwëbeng rak sën alam Israel dekeyëh aga lo. ³¹ Yonon, alam Israel dekeyëh gagek gwëbeng in bë ham gweko semusën jak, lok mëm rëk nom degérin sir medegeko semusën geving vu tamusën. ³² In Anutu vuu mehönon pin ya bedenedo los hir ngaa nipaya medeginengin sir in bë mëm rëk gevong yi gagek kwa vonginsën noh vu sir pin.

Yik Hil Gaço Anutu Arë Jak

33 Alam-e! Hil napisek in Anutu in kwa bëpata ben-
eraķ ngaa pin ni los dahis kesuu mehönon
pin.

Hil su ayoh vu bë ajak yi gagek sën kwa nevo
lo ni rë,
gehil su ayoh vu bë ajak ngaa sën nevong lo ni
rë.

34 Yoh vu sën dekevu meneggëp lok yi kapiya lo bë:
“Re rak Mehöbëp kwa ni?

Ma re vo kwa vu yi?”

35 “Ma re vo ngaa vu yi mugin
om rëk bo dok nah vu yi?”

36 Ma! Yi yö tung ngaa pin.

Geyö ti tu ala benegin ngaa pin.
Bengaa pin tu yi ngaa.

Om hil gaço arë jak na vavunë degwata los
degwata. Yönon.

12

Hil Getung Navid Na Vu Anutu Nabë Seriveng

¹ Om arig lo, Anutu kwa vongin hil, om sa gejiiin
ham bë ham gwevong navimin vu Anutu nabë
sën mehönon denetung seriveng vu yi lo. Ham
bo vabuung in ham navimin megwetung natu
seriveng vu Anutu, rëk mu ham medo vesamin in
ham gwevong yi huk, lok mëm rëk kwa vesa in.
In ngaa nebë saga og ngaa yohvu meneko Anutu
arë rak. ² Log ham su sepa dok ngaa sën alam-
dob-yi denevong lo, gaķ ham gwérin ham kwamin
menatu mewis in ham jak ngaa sën Anutu kwa
nevo bë nivesa los yohvu geniröp rot lo ni.

Hil Dahun Hil Gadoķ Vu Hil Arid Lo

³ Anutu vong semusën vu sa, om sa bë nanër vu ham pin ti ti nabë ham su gweko ham jak mesevök ham huk, gak ham ngo sepa dok ham huk megwevong niröp. Log ham ti ti ngo seggi ham huk saga niröp noh vu niwëek sën Anutu vo vu ham lo. ⁴ In hil navid len ti ti lo neggëp, rëk mu hir huk su neggëp ti rë, gak denevong huk aggagga yö yoh vu sir. ⁵ Lob yiķ hil ngahisekë nebë saga, rëk hil atu Kerisi-yi-alam yu timu. Lob hil pin yiķ anon timu gelen ti ti lo. ⁶ Anutu vong semusemu vu hil nyëmasën, gevo kwa aggagga vu hil, om nabë mehöti yoh vu bë nanër ġagek rangah in ko semusën sënë vu Anutu, og mehöti sënë nanër ġagek rangah noh vu niwëek sën Anutu vo vu yi lo. ⁷ Genabë semusën neggëp vu mehöti in bë gegin ari lo in huk og gegin. Log nabë mehöti yoh vu bë tahu alam in ko semusën sënë vu Anutu, og mehö sënë natu tatovaha betahu alam. ⁸ Log nabë mehöti kwa neggëp in bë nanër Anutu yi ġagek tato vu alam, og gevong banon jak. Log nabë mehöti bë bo ngaa vu ari lo, og gevong vu sir los ayo timu. Log ggev sën negin yi alam lo, og gegin sir niröp gesu ni tebö. Log mehöti bë kwa paya in ari medok vu yi, og dok vu yi los kwa vesa.

Ham Ahëmin Geving Ham Arimin Sën Kerisi-yi-alam Lo Yönon

⁹ Sën ham ahëmin geving arimin lo lo, og ham su gwekuung jak. Gak ham ahëmin geving sir yönö. Ham gweruu demimin vu ngaa nipaya geham napiik vu ngaa nivesa. ¹⁰ Ham kwamin bo Kerisi-yi-alam pin nabë ham arimin sir bemëm

ham ahëmin geving sir yönö. Ham pin ti ti gwekö arëmin jak vewen vewen. ¹¹ Ham ayomin kehe ham beham gwevong Mehöböp yi huk niwëëk noh vu buk geham su nimin tebö. ¹² Ham bo kwamin in Mehöböp bemedo los kwamin vesa. Nabë maggin natök vu ham, og ham bare niwëëk. Geham ngo medo najom jak noh vu buk. ¹³ Nabë Anutu-yi-alam la dejak vu in ngaa, og ham dok vu sir, log nabë alam-yu-ngwë deberup vu ham, og ham gwegin sir nivesa. ¹⁴ Bë alam degevong paya vu ham, og ham najom jak nabë Anutu gevong nivesa vu sir. Kë! Ham najom jak nabë gevong nivesa vu sir. Gaķ ham su terot sir los najom jak nabë Anutu gevong paya vu sir. ¹⁵ Alam sën kwaj vesa lo, og ham kwamin vesa geving sir, log ham semu ayemin in alam sën ayoj maggin medenesu lo. ¹⁶ Ham medo jevuh ti. Ham su kwamin bo nabë ham böp, gaķ ham los alam sën su los bengöj rë lo sepa ham. Ham su ngo kwamin bo ham menanër nabë, “Sengo timu los kwag!” ¹⁷ Nabë mehöti gevong paya vu ham, og ham su gwevong nipaya dok nah nyëvewen vu yi. Gaķ ham kwamin bo ngaa nivesa mu megwevong jak alam pin malaj. ¹⁸ Ham gwegin ham in begö degwa su gëp vu ham, gaķ ham malamin sepa sën ham medo jevuh ti geving alam pin lo. ¹⁹ Om sa mehö lo, ham su ngo bo dok ngaa nipaya sën denevong vu ham lo, gaķ ham naköök gAnutu ahë sengën vu sir megevong dok nah vu sir. In gaġek neggëp lok Anutu-yi-kapiya nebë: Mehöböp nér bë, “Voloksën nipaya nyëvewen og sengo sa huk, om ham naköök gesengo rëk bo dok nah.” ²⁰ Rëk mu nabë:

“Mehö sën nevong paya vu hong lo nadiikahë,
og gebo nos vu yi.

Genabë ayo bev in bël og gebo bël kul vu yi.

Yönon, nabë gwevong nabë sënë,
og rëk getah yi nah bekwa bo yi ngaa nipaya
sën lo bemëm ni namum in.”

21 Su gwevong bengaa nipaya kepë hong, gak
gebare niwëek megekwepë ngaa nipaya jak ngaa
nivesa.

13

Hil Agurek Gavman Babu

1 Ham pin gurek alam sën detu gavman medenegin ham lo babuj. In gavman su yö deggooin sir rak rë, gak Anutu vo niwëek vu gavman vu nyëg pin in huk pin. Lob Anutu yö tung gavman vu nyëg pin medenedo. **2** Nebë saga om nabë mehönon dekeyëh gavman, og dekeyëh Anutu ving. Om rëk denatök vu nyëvewen.

3 Alam nijvesa su deneggöneng in kiap rë, gak mëm alam sën denevong ngaa nipaya lo mu mëm deneggöneng in. Nabë ahëm ving bë su gegöneng in gavman, og gwevong ngaa nivesa jak buk pin, lob mëm rëk gavman geko arëm jak. **4** In Anutu tung gavman in bë dok vu hong megemedo nivesa. Rëk mëm nabë gekweyëh horek og gegöneng. Gerak ni bë begö sën nejom lok nema lo, og su neko meris rë. Gak Anutu tung gavman in bë degevong yi huk medebo nipaya dok nah vu mehöti sën gevong ngaa nipaya lo. **5** Nebë saga om hil agurek gavman babu. Rëk mu hil su agöneng in ngaa nipaya nyëvewen sënë mu mesepa dok hir gahek,

gak hil kwad bo nabë sënëk ngaa niröp, om hil sepa dok.

⁶ Log sën hil getung takës lo, og ngaa niröp ving, om gwetung in Anutu vo huk lok alam gavman nemaj medetu yi hur. ⁷ Om nabë gavman degetung horek in ngaa ti nabë degeko takës jak, og gebo monë jak vu sir noh vu saga. Alam sën deneko takës lo, og ham gwetung takës vu sir niröp. Galam sën deneko takës-kupek-yi (kastams) lo, og ham bo takës-kupek-yi vu sir niröp geving. Log alam sën denegin ham lo, og ham gurek babuj, galam sën denetu ggev lo, og ham gweko arëj jak.

Bë Ham Ahëmin Geving Mehönon Og Sagak Ham Nesepta Lok Horek Yönon

⁸ Ham göneng in nyëvewen pin nabë su gëp vu ham. Gał yik nyëvewen timu sënë yö gëp vu ham vewen vewen degwata nabë: Ham ahëmin geving ham vewen vewen jak buk pin. Nabë ham gwevong nabë saga, og ham nevong yoh vu sën Horek nér lo. ⁹ In Horek nér nebë sënë bë, “Su gegodek mehö ngwë venëj los reggaj. Su gengis mehönon medenadiik. Su gegodek. Su ayom nevu nevu in mehö ngwë hir ngaa.” Horek sënë gevahi sën neggpë lo, og yik pin degwaj timu sënë nebë, “Ahëm geving alam sën denedo dus vu hong lo nabë sën ngo ahëm neving hong.” ¹⁰ In mehö sën ahë neving mehö ngwë lo, og su rëk gevong paya vu yi rë. Om nabë hil ahëd geving mehönon, og hil nesepta lok horek pin menehevong yoh vu.

Hil Gevong Ngaa Niröp

¹¹ Ham ahëmin geving ham nabë sënë in ham rak ni bë buk verup ggovek ya, om ham malamin

natum beham kwedi jak. Buk sën Anutu gekö hil nah vu yi lo yam dus teka, gak su neggëp ading in hil nebë sën neggëp lok buk sën hil nehevong ving nyédahis lo rë. ¹² Mala vahis vongin nama na gedus rak bë rangah vongin berup. Om mak hil gevuu ngaa malakenu yi pin na, gehil ağérin hil navid jak ngaa rangah yi. ¹³ Hil ana aggata niröp nabë sën mehönon deneya rangah. Hil su sepa dok alam sën denesup sir in bë denanum böp medegevong ngaa jeggin jeggin lo. Hil su gevong baggëb gegevong ketod vu ngaa ningöhek jeggin jeggin. Hil su ayod nevu nevu in mehö ngwë hir ngaa, log hil su ahëd sengën bemehoo hil. ¹⁴ Gaķ ham gweko Mehöböp Yesu Kerisi begwevëh nabë tob in gérin ham in ngaa nebë saga. Geham su kwamin bo megwevong ngaa nipaya sën ham malamin anon in lo.

14

Hil Su Seggi Arid Lo

¹ Mehöti sën ayo neya vu Yesu mahan teka mu lo, og ham gweko yi nam geving ham sën Anutu-yi-alam ham lo. Rëk mu ham su ngis begö vu yi in gagek vahi. ² In alam vahi ayoj neya timu vu Yesu niwëek, lob denegga reggu los ngaa aggagga pin. Rëk alam vahi mu su denevong ving niwëek rë, lom sën denegga jojeng los nos mu. ³ Om mehöti sën negga ngaa pin lo su kwa bo gagek jak mehö ngwë sën neggoneng in reggu lo. Gemehö sën su negga reggu rë lo su kwa bo gagek jak mehö ngwë sën negga ngaa pin lo nabë nevong paya. Gak Anutu ko mehö ngwë sën negga reggu lo yom ving. ⁴ Hong mehö re om genenér gagek nipaya rak

mehö ngwë yi hur-a? Nabë bare, ma nabë bës, og ala yö yi ngaa. Rëk mu rëk bare niwëëk. In Mehöböp yö yoh vu bë bo niwëëk vu yi mebare niwëëk.

⁵ Log mehö la kwaj nevo buk vahi bë bëpata rot kesuu buk vahi. Log mehö ngwë kwaj nevo bë buk pin neggëp ti gesu ngwë kesuu ngwë rë. Om alam pin ti ti yö deseggi gagek sënë bedegevong noh vu ngaa sën kwaj nevo bë neko Anutu arë rak lo. ⁶ In mehö sën kwa nevo buk ti nebë buk bëpata rot lo, og nevong nebë sënë in geko Anutu arë jak. Gemehö sën negga ngaa pin lo, og negga in geko Anutu arë jak. In nejom rak ya vu Anutu los kwa vesa in reggu genegga. Log mehö ngwë sën su negga reggu rë lo, og su negga rë in geko Anutu arë jak. Genejom rak ya vu Anutu los kwa vesa in nos meris mu genegga. ⁷ Hil ti ti su ngo atu ala menanér bë hil medo vesad ma, hil nadiik na rë. ⁸ Gaç nabë hil medo vesad, og Mehöböp yö yi ngaa. Genabë hil nadiik, og Mehöböp yö yi ngaa. Om nabë hil medo vesad ma hil nadiik, og Mehöböp yö ti yi ngaa hil. ⁹ Om sën Kerisi diiük gevesa lok yah in bë natu alam diiksën los malaj-vesasën hir Mehöböp. ¹⁰ Nebë saga, om su gwelë arim paya megenanér nabë yi mehö nipaya. Ham vahi nevong nebë saga rëk su yoh vu rë, in hil pin rëk bare Anutu mala begengo hil gagek. ¹¹ Sënë yik yoh vu gagek sën neggëp lok yi kapiya lo nebë: “Mehöböp nér bë, ‘Sa nado malağ-tumsën yönrot,
om sa gagek sënë rëk anon jak yönrot gev-ing nabë:

Alam pin rëk dengun lusej gedenadudek vu sa,

galam pin rëk avij gekö sarëg jak.' "

¹² Om hil pin ti ti ngo rëk nanér hil huk degwa tato vu Anutu.

Hil Su Gevong Ngaa Nipaya Begevong Paya Vu Arid Lo

¹³ Nebë saga, om hil su kwad bo gägek nipaya jak arid lo gökin. Gakö hil kwad bo hil arid lo nabë hil su tato aggata paya vu sir in rëk debës bemalaj nama. ¹⁴ Setu Mehöböp Yesu yi mehö meserak ni bë nos los reggu ti su yö nipaya vorot rë. Gakö nabë mehöti yö kwa bo ti nabë nipaya besu yohvu rë, og nos ma reggu saga tu nipaya vu yi. ¹⁵ Nebë sënë om nabë ngaa sën genewa lo nevong paya vu arim sën Kerisi yi mehö lo bekwa neya ngahi, og su ahäm neving yi yönö rë. Kerisi diik in arim ti sënë, om su gwevong paya vu yi jak nos sën genewa lo. ¹⁶ Om su gwevong ngaa nabë sënë, in kwam nevo bë nivesa, rëk alam vahi rëk kwaj bo nabë su yohvu rë. ¹⁷ In ngaa sën hil ağa los nanum lo su yoh vu bë gevong behil natu Anutu-yi-alam rë, gakö nabë Anon Vabuung gevong behil malad sepa ngaa niröp, gehil ayod gëp revuh, gehil kwad vesa, og saga sën tato bë hil atu yi alam. ¹⁸ Bë mehöti natu Kerisi yi hur mesepa dok aggata sënë, og Anutu rëk kwa vesa in yi gemehönon rëk degelë yi nabë yi mehö nivesa. ¹⁹ Nebë saga om hil sepa dok aggata pin sën gevong mehil medo jevuh ti lo, gaggata sën bo niwëek vu hil arid lo lo. ²⁰ Ham su nanér ham in nos megwevong paya vu Anutu yi huk. Yönö, ngaa pin nivesa sën bë hil ağa. Rëk mu nabë ngaa sën genewa lo gevong bemehö ngwë bës, og sënë netu hong ngaa nipaya.

21 Nabë arim ti gelë gegegwá reggu ma ǵenanum wain ma, gwevong ngaa ngwë, lob sënë gevong bebës, og maam su gwevong genök gëp. **22** Rëk mu nabë ǵejak ni nabë ngaa pinek yohvu, og yik melu Anutu ngó ham ngaa gesu gwevong ǵagek berup jak begwevong paya vu arim lo. Nabë mehöti kwa bo ngaa ti nabë ngaa nivesa gesu kwa na luu luu in rë, og yö kwa vesa. **23** Gak nabë mehöti nega ngaa ti gayo nena luu luu in, og nipaya neggëp vu yi. In su ayo neya timu rë geyö gga jeggin. Ngaa pin sën mehönon su ayoj ya timu vu rë geyö denevong lo, og netu ngaa nipaya vu sir.

15

Hil Sepa Dok Kerisi Kwa

1 Hil sën nare nid wëëk lo, hil najom hil ahon in dok vu alam sën su denare nij wëëk rë lo. Gak hil su sepa dok hil ngo kwad megevong paya vu ayoj. **2** Hil pin ti ti ngo kwad bo hil alam madok vu sir in degeko kwa nivesa bemëm nij wëëk jak. **3** Hil arak ni bë Kerisi og su nesepa lok yö kwa rë. Gak ngaa sën netök rak yi lo neyoh vu gagek sën neggëp lok Anutu-yi-kapiya lo bë, “Gagek pelësën sën alam denenér rak hong lo yam nerak sa.”

4 Log gagek pin sën dekevu wirek meneggëp lo, og dekevu in bë bër hil kwad. Dekevu ǵagek sënë in bë bo niwëëk vu hil, log gevong behil bare nid wëëk, gehil gevong geving, gabò kwad in sën Anutu geko hil nah lo. **5** Ham sepa dok Kerisi lob Anutu sën negadu mehönon los nevong behil nare nid wëëk lo gevong beham medo jevuh ti nabë sën Kerisi Yesu luho Ama denedo revuh ti lo. **6** In

ham kwamin gëp ti gayemin dok ti megweko hil
Mehöhöp Yesu Kerisi Ama Anutu arë jak.

Kerisi Nelok Vu Alam Yuda Losho Alam-yu-ngwë

⁷ Om ham pin gweko arimin sën Kerisi-yi-alam lo beham medo los ahëmin geving ham nabë sën Kerisi ahë neving ham lo, lok mëm saga sën rëk geko Anutu arë jak. ⁸ Lom sa bë nanér vu ham nabë Kerisi tu hur in dok vu alam Yuda sën denerah* navij lo. Vong nebë sënë in bë tato nabë Anutu yi gagék anon, los gevong bAnutu yi gagék pin sën joo vu kenuj lo wirek lo anon jak. ⁹ Lob nevong in bë alam-yu-ngwë degelë nabë Anutu kwa vongin sir, lom degeko arë jak noh vu gagék sën neggëp lok Anutu-yi-kapiya lo nebë:

“Om sën sëk nanér arëm rangah vu alam dahis.

Gesék gevong raro megako arëm jak.”

¹⁰ Log gagék ngwë neggëp lok yi kapiya ving nebë:
“Ham alam-yu-ngwë, ham kwamin vesa geving yi alam.”

¹¹ Log dus ngwë nér ving nebë:

“Ham alam-yu-ngwë pin, ham gweko Mehöböp arë jak.

Geham mehönon pin, ham gweko arë jak jak raro.”

¹² Log Yesaya nér ving bë:

“Yese yi mewis ti rëk berup,

lob rëk arë böp jak megegin alam-yu-ngwë.

Lob rëk debo kwaj in yi nabë

gegin sir megevong nivesa vu sir.”

¹³ Om Anutu sën nevong mehil navo kwad in yi lo gevong beham kwamin vesa rot, geham ayomin gëp revuh jak sën ham ayomin neya timu vu yi lo.

Log mëm Anon Vabuung gevong niwëek vu ham, beham bo kwamin in buk sën geko ham nah vu yi lo bemedo gwegin yi los ayomin dahis.

Paulus Kwa Vesa In Huk Sinarë Sën Nevong Agi

¹⁴ Arig lo, sa kwağ vo lok ayoğ meseraḳ ni bë: Ham malamin nesepa ngaa nivesa geham kwamin neggëp in ngaa vahi pin, om ham ngo yoh vu bë dok vu ham mebo kwa vu arimin lo.

¹⁵ Rëk gagék vahi sën sa nekevu yok vu ham lo, og niwëek teka. Rëk sa su nahöneng rë, gesa kevu in bë bër ham kwamin. In Anutu vong huk sënë lok sa nemag ¹⁶ in bë sa natu Yesu Kerisi yi hur mena vu alam-yu-ngwë menanér Anutu yi Bengö Nivesa rangah vu sir. Sa nebë alam-deneko-seriveng ti, lob sa bë gako alam-yu-ngwë denam vu Anutu bAnon Vabuung gevong medenatu vabuung gesa getung sir denatu seriveng sën Anutu gelë nivesa lo.

¹⁷ Lob Kerisi Yesu negadu sa balu nehevong huk lok ti, om sën sa kwağ vesa in huk sën sa nehevong vu Anutu agi. ¹⁸ Sa su hevongin bë nanér ngaa ngwë rë, gak yik sa bë nanér ngaa timu sënë nabë: Kerisi vo niwëek lok sa gagék los ngaa sën sa nehevong lo, lob ggérin alam-yu-ngwë yom rak sënë. ¹⁹ Vo niwëek vu sa nebë sagi, lob sa hevong ngaa bop aggagga. Gevo Anutu yi Anon Vabuung niwëek vu sa ving. Om sën senér Kerisi yi Bengö Nivesa pin rangah ggëp Yerusalem nyéda his, besaya meyoh vu nyég pin beverup Ilirikum.

²⁰ Lob sa bë nanér Bengö Nivesa vu nyég vahi sën yö nahën denedo gesu denengo Kerisi bengö rë lo, in sa su bë rëk dev beggang jak na mehö

ngwë hir mudeng vavunë rë. ²¹ Gaķ sa bë gevong nabë sën ġaġek neggëp lok Anutu-yi-ķapiya lo bë:
“Alam sën su denengo bengö rë lo,
og rëk degengo.

Galam sën su denengo yi gagek rë lo,
rëk dejak ni.”

*Paulus Kwa Nevo Bë Na Berup Gelë Alam Rom
Gena Spain*

²² Lob huk sënë ggérin sa rot, lob sa su yoh vu bë nök vu ham wirek rë. ²³ Gaķ sahëg neving yoh vu ngebek ngahisekë rot bë senök galë ham rëk ma. Rëk gwëbeng og huk su ggérin sa vu sënë rë, ²⁴ lob sa bë na dob Spain, om maķ sëk nök berup galë ham namugin rë lok mëm sena. Gesa bë medo teka geving ham bekwaġ vesa rë, lok mëm ham rëk gweko sa na geto aggata Spain. ²⁵ Rëk mu sëk na Yerusalem rë, in sa bë dok vu Anutu-yi-alam gëp sagu rë. ²⁶ In alam Masedonia los Akaya yö kwaj nevo medenér ġaġek venuh bë dengupin seriveng medebo na Yerusalem vu Anutu-yi-alam sën denerak vu in ngaa lo. ²⁷ Yö kwaj nevo bë degevong nabë sënë, og nivesa, in alam Yerusalem hir nyēvewen neggëp vu sir. Alam Yuda devo Bengö Nivesa vu alam-yu-ngwë in bë dok vu anoj, om sën nyēvewen neggëp vu alam-yu-ngwë in bë dedok vu sir geving jak ngaa navij yi. ²⁸ Om sa bë gevong seriveng sënë los dahis dok na nemaj niröp behuk sënë nama na rë, lok mëm senök berup aggata vu ham mesena Spain. ²⁹ Lob serak ni bë nabë senök berup vu ham, og sëk ġaġo Kerisi yi semusën bōpata benök vu ham.

³⁰ Arig lo, sa bë ketag vu ham nabë ham tu hil Mehöböp Yesu Kerisi yi alam vorot, log Anon Vabuung vong ahëvingsën vu ham, om ham nimir wëek menajom jak in sa pangsen geving nabë Anutu dok vu sa. ³¹ Ham najom jak nabë Anutu gevong balam Yudea vahi sën denekeyeh gagek lo su denajom sa ahon. Log ham najom jak nabë Anutu gevong beyi alam vu Yerusalem su nijs dëlin seriveng sën sa nehako ya in bë dok vu sir agi. ³² Om nabë Anutu kwa, og sëk nök berup vu ham los kwaq vesa besewah memedo teka geving ham rë.

³³ Anutu sën nevong behil ayod neggëp revuh lo nök bemedo geving ham pin. Yonon.

16

Paulus Nér Gagek Yoh Vu Alam Ngahisekë Bë Kwa Nevo Sir

¹ Sa hevongin bë ham gwegin hil avéhnöd Poebe nivesa. In nevong huk menelok vu Kerisi-yi-alam vu Kengkreai. ² Geham kwamin bo Mehöböp begweko Poebe nök medo geving ham. In hil sën Anutu-yi-alam hil lo, og hil gevong ngaa nivesa nabë sënë. Log nabë maggin ti neggëp vu yi, og ham dok vu yi. In nelok vu alam ngahisekë genelok vu sa ving.

³ Ham nanér sayeg vu Priska luho regga Ak-wila nabë sa kwaq nevo luho. Luho sën alöö nehevong Kerisi Yesu yi huk timu lo. ⁴ Luho delok vu sa in gagek wirek. Su deneggöneng rë, gedus rak in bë luho denadiük dok nah sa bög rëk ma. Lom su

sengo ti kwaǵ vesa in luho rē. Gak alam-yu-ngwē pin sën detu Kerisi-yi-alam lo denepisek in luho ving.

5 Geham nanér vu Kerisi-yi-alam sën denesupin sir lok luho hir begganḡ medenelē Soda lok lo geving nabë sa kwaǵ nevo sir.

Log ham nanér vu Epainetus sën sahëg neving yi rot lo nabë sa kwaǵ nevo yi. Yi sën ggérin yi mugin betu Yesu yi mehö kesuu alam distrik Asia vahi pin lo.

6 Geham nanér vu Maria sën nevong huk niwëek menelok vu ham sën Kerisi-yi-alam ham lo nabë sa kwaǵ nevo yi ving.

7 Geham nanér vu Adronikus luho Yunia sën alöö anér Bengö Nivesa rangah lo geving nabë sa kwaǵ nevo luho. Luho detu Kerisi-yi-alam mugin lok mëm sa tamu, lob luho arëj lok ya ving alam sinarë nyé dahis bë sir ggev.

8 Log ham nanér vu Amplias nabë sa kwaǵ nevo yi. Sa mehö saga, in alu atu Mehöböp yi hur.

9 Geham nanér vu Urbane, sën alu nehevong Kerisi yi huk lo nabë sa kwaǵ nevo yi, geham nanér vu sa mehö Stakus geving.

10 Geham nanér sayeg vu Apeles sën denenér bë nesepa lok Kerisi yönöñ lo nabë sa kwaǵ nevo yi.

Gevu Aristobulas losho alam pin sën deneggëp ving yi lok yi begganḡ lo geving.

11 Geham nanér vu Herodion sën alu he degwa timu lo, gevü Mehöböp-yi-alam sën denedo

lok Narkisus yi begganḡ lo geving nabë saǵa.

¹² Log ham nanér vu Trupena luho Truposa sën luho denevonḡ Mehöböp yi huk niwéék lo geving,

gevu Persis sën sahég neving yi lo, in nevonḡ huk vu Mehöböp panḡsén lo.

¹³ Geham nanér vu Rupus, mehö nivesa sën Mehöböp ggooin yi rak in natu yi hur lo, nabë sa kwaḡ nevo yi, geham nanér vu ata sën vonḡ bë sataḡ ving lo geving.

¹⁴ Geham nanér vu alam pin sënë: Asunkritas, Plegon, Hermas, Patrobas, Hermes, gevü hil arid lo pin sën denedo ving sir lo nabë sa kwaḡ nevo sir.

¹⁵ Gevu Pilologus luho Yulia, gevü Nereus luho avéhnö, gevü Olumpas losho Kerisi-yi-alam pin sën denedo ving sir lo geving.

¹⁶ Ham najom* arimin sën Kerisi-yi-alam lo nemaj in Mehöböp-yi-alam ham, log Kerisi-yi-alam pin vu sënë denevonḡ gagek semusën yök vu ham ving.

Alam La Bë Debasuh Kerisi-yi-alam

¹⁷ Arig lo, sa bë bër ham kwamin in alam sën denevongin bë debasuh ham bedekepë ham lo. Denekeyéh Yesu yi gagek sën ham ko ggovek ya lo, om ham gweruu demimin vu alam nebë sënë!

¹⁸ In alam nebë sënë og su denevong hil Mehöböp Kerisi yi huk rë. Gaǵ malaj anonin ngaa aggagga pin sën nesemu hil navid lo mu gesu denejom sir ahon rë. Yönón, nabë alam nijvesa su kwaj bo hir gagek medeseggi nivesa rë, og alam sagi hir gagek

nengën los jeji rēk tetuhin sir. ¹⁹ Alam pin dengó ham bengömin bē ham nesepa lok Anutu yi gagek, lob mēm sa kwağ vesa rot in ham. Rēk mu sa bē ham ngō jak ngaa nivesa ni rot, geham su kwamin bo ngaa nipaya. ²⁰ Lok mēm Anutu sēn nevong behil ayod neggēp revuh lo baķē Satan gevek na ham vahamin ġebinē beham gwevong riī jak.

Hil Mehöböp Yesu Kerisi gevong yi semusen nök vu ham.

Alam Vahi Denér Gagek Los Ahēj Nivesa Ya Vu Alam Rom

²¹ Log sa mehö Timoti sēn alu nehevong huk lok ti lo nér bē kwa nevo ham ving. GeLusius lööho Yason lu Sosipater sēn yiķ he degwa ti lo, yiķ denenér nebē sagi ving.

²² Log sa Tertius,* sa hango gagek sēnē rak verup Paulus avi besa kevu kapiya sēnē rak ngō nemag. Sa hevong gagek yök vu ham bē sa kwağ nevo ham ving in Mehöböp-yi-alam hil.

²³ Log Gayus sēn negin sa lok yi beggang agi losho Kerisi-yi-alam pin sēn denesupin sir medenelē Soda lok ben lo, denenér bē kwaj nevo ham ving. Gehil arid Kwartus† luho Erastus, sēn tu kuskus menegin kaunsor nyēg böp sēnē hir monē lo denenér nebē sēnē ving.

²⁴ [Hil Mehöböp Yesu Kerisi yi semusemu nök gēp geving ham pin. Yonon.]

Yiķ Hil Gaķo Anutu Yō Ti Arē Jak

* **16:22:** Hil nanér arē sēnē dok hil ayed nabē Gwee † **16:23:** Hil nanér arē sēnē dok hil ayed nabē See

25 Hil gako Anutu arë jak na vavunë in yö yoh vu bë gadu ham meham sepa dok Yesu Kerisi yi Bengö Nivesa sën sa nanër lo. Mehönon su denerak gagek sagi ni rë, gak yö neggëp vunsën wirek wirek, rëk mëm gwëbeng sënë og Anutu tato yam rangah. **26** Anutu sën yö nedo degwata lo yö nér meneggëp rangah, om sën he nanër gagek sënë rangah vu alam-yu-ngwë pin yoh vu sën alam-denenér-gagek-rangahsën dekevu wirek meneggëp lok Anutu-yi-kapiya vorot lo. Anutu vong nebë sënë in bë alam-yu-ngwë degevong geving medesepa dok yi aggata. **27** Yik Anutu timu sënë sën yi mehö los kwa yönö, om hil gako arë jak na vavunë degwata los degwata jak Yesu Kerisi. Yönö.

**Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini**

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files
dated 9 Oct 2020
18a972db-abcc-5dc3-9031-f1d4455b33c3